

9

HARVARD COLLEGE LIBRARY
FROM THE
HARVARD-YENCHING
INSTITUTE

SEP 30 1928

Ch L 5670.2928

7/2928

T 5237.7.2928

明詩綜卷十八上

小長蘆 朱彝尊



吳都 陸秉鑑 緝評

曾 祭 八首

祭字子啓吉安永豐人永樂甲申賜進士第一授翰林修撰歷侍講侍讀學士左春坊大學士進詹事府少詹事卒贈禮部左侍郎謚襄敏有

巢睫集

楊東里云子啓迅筆千言不費思索而理致文采皆到雖

繡爛然狀寫之工極其天趣他人不足彼嘗有餘 王行儉云曾公詩詞雄放清麗出入盛唐諸大家 徐子元云曾詩如天馬行空不可控

御 素永之云曾公浩若懸河所乏嚴潔 王元美云曾子啓如封節度募兵東征鮮華雜沓精騎殊少 項子長云子啓天才雄麗所乏者謹嚴精潔耳 穆敬甫云曾詩富於才情湧瀉如泉在永樂中可稱獨步 顧玄言云少詹才長七古該博逸蕩惟以健捷為工頗以繁靡為

累蔣春甫云少詹詞鋒豔發若青萍倚天韻語
清華如紅蕖透水又如金羈玉勒微有蹄齧之恨

靜志居詩話子啓下筆不休不事推敲偶合繩墨五言如斷雲京口樹
殘月廣陵鐘暝色迎官舫春寒到客衣雨從江北少山到宿州多殘燭
明官舫疎鐘出郡樓寒潮瓜步月殘雨秣陵舟七言如雲中鸞鳳扶雕
輦水底魚龍識翠華草綠野塘多是水雨晴沙路不成泥平鋪碧甃連
馳道倒瀉銀河入苑
牆均不失唐人風格

呂梁洪

洪流昔懷襄區域信茫昧斯民靡寧居嬰此昏墊害呂
梁塞衝波滔天勢橫潰怒霆鬪鏗旬飛瀑瀉澎湃神哉
夏先后敷理乘四載沛然導東注下與百川會造化有
設險惟此乃其最扁舟泝奔流涉歷今已再水師身手
捷徑渡良足快緬懷胼胝勞遺跡遠猶在偉茲疏鑿功
萬世終永賴

題王孟端墨竹送人南歸

十年官舍長安陌欲種篔簹愁地窄軒前有此八九竿
蒼然一片瀟湘色九龍山人思不羣曾襟灑落如此君
筆端颯颯起風雨紙上漠漠生烟雲幾回看竹稱奇絕
為寫琅玕照冰雪縱橫屈鐵金錯刀滿堂便覺秋蕭騷
周郎愛竹癖於我興至時尋竹邊坐我生疎懶無所為
但與江海同襟期喜君愛竹有如此便以此圖持贈之
丹楓白水江南路歸帆直向湖中度慎莫提攜過葛陂
恐化羣龍上天去

駕發臨城

雞鳴寒漏徹車駕發臨城殘月千山曙浮沙一路平雲

光隨鳳輦露氣濕霓旌馬上頻回首猶看燎火明

荏平

地旱空多井林疎遠見樓平山通縣界潑水入河流過
客詢張鎬鄉人說馬周北來多古蹟惜未得淹留

涿鹿道中

遠樹孤城出高原四望遙山從平地起雪到暮春消細
草承雕輦垂楊拂御橋愁連易水上風色正蕭蕭

德州

幔城初解向朝暎霜冷重裘曉未溫小邑有城皆壘土
荒原無徑可通村郵亭過客頻詢路茆屋遷民久下屯
此去景陽州不遠建牙鳴鼓是營門

別弟憲副鼎

莫向尊前唱渭城老來離別最傷情江南渺渺孤舟夢
嶺外迢迢萬里程驄馬曉嘶霜氣肅鱷魚夜徙海潮平
到時應及春初候先報京華白髮兄

夾溝

東風吹暖柳絲柔十里青山繞夾溝馬上逢人相借問
計程兩驛到徐州

周

述

三首

述字崇述吉水人永樂甲申賜進士第二授翰
林編修進諭德陞左庶子有東野集

詩話唐人讌集賦詩每推一人擅場如昇平公主席上李端擅場送王
峻鎮幽朔韓翃擅場劉相巡江淮錢起擅場他未暇悉數永樂中命翰

林賦白象則胡庶子廣第一賦神龜則王贊善汝玉第一午門觀燈則陳員外宗第一然員外觀燈之作比之周庶子陳祭酒似猶遜之實非擅場也

玩秀軒

華軒臨清流秀色堪攬結霞彩相蕩漾波光互明滅花
飛渡頭春帆落洲上月縱觀心目超靜對形神悅應共
滄浪人濯纓笑予拙

賜觀燈詩

今夕逢元夕歡聲遍九垓星臨銀漢動月傍碧空來紫
禁千花繞金門五夜開聖情同宴賞玉漏不須催

寄楊顯道先生

我憶楊夫子風流似昔人素琴長對月白髮不憂貧彭

澤陶元亮稽山賀季真相思欲相見烟樹幾回春

周孟簡一首

孟簡字孟簡吉水人永樂甲申賜進士第三官

詹事府丞出為襄府左長史有竹磻集

丙午除夕

為客逢今夕寧親憶去年一尊終不醉孤館自無眠家
在雲山外身依日月邊何堪雙鬢改又值歲華遷

李時勉七首

時勉名懋以字行江西安福人永樂甲申進士
選庶吉士授刑部主事進侍讀改御史官終國
子祭酒卒謚文毅改謚忠文有古廉集

明詩卷之八
四
詩話忠文古之遺直不以詩名而扶風數篇雖未遠擬秋胡要非拙手可辨予嘗獲公致湯都閩手書楷法適勁乃知書亦能品也

古詩為扶風竇滔妻作 七首

深閨有思婦慘悽亦何為容華不自惜獨理流黃機言
將成匹帛多裁游子衣衣新忽變故恩愛從此衰以茲
殷勤意翻作長恨辭

蘭茝被幽畹桃李媚春陽新婚結綢繆擊衿散芬芳弃
置父母歡婉婉君子傍白日麗朝彩朗月澄夜光矢心
以相顧願為鴛與央

西墅起高臺迢遞憑雲岑中有嬌豔女當窗弄清音音
容蕩以肆居然變同心魚目奪明月讒口鑠黃金不見
冀中饑惻愴廢屢吟

高車擁旌旆輝映漢江曲富貴一朝異窈窕辭別屋言
笑落日遲浩歌湘水綠山川不可踰安得遙相逐佳麗
誠足珍涼薄難見錄

滔滔江漢流到海不復返千里得所歸中復厭婉婉在
昔枉綏授駕言不辭遠誰知三周御却道羊腸坂芬芳
空自持白日忽以晚

昧旦不能寐攬衣起中堂織縑與織素誰復知短長咫
尺組幽思迴還遂成章緘之戒僮御欲以寄遠方宛轉
達苦志敢期昔所伉

別久意恒親覽辭念愈結巾車適千里倏忽已超越嗚
琴諧古調恩愛感離闊夙心諒所負慙歎對明月睠言

固終始皓首以相悅

陳敬宗 二首

敬宗字光世慈溪人永樂甲申進士選庶吉士授刑部主事改翰林侍讀轉南京國子司業陞祭酒卒贈禮部右侍郎謚文定有澹然居士集

陳卧子云文定詩典質和平盛世之風

詩話祭酒清德與李忠文並重號南陳北李詩特雍容溫粹洵稱盛世之音

元夕賜觀燈詩

劍佩清宵近峰巒翠閣重花明金殿月香度玉樓風拜舞諸蕃集歡娛萬國同遙聞歌吹發五色度雲中

白蓮

太液澄波濯素容玉衣垂影水晶宮月明無處尋顏色只信香飄十里風

王英 七首

英字時彥金谿人永樂甲申進士選庶吉士歷翰林修撰侍講再扈駕北征累官南京禮部尚書卒謚文安改文忠有泉坡集

蔣春甫云尚書詩雄壯宏大氣象自好

詩話西王密切謹嚴句無浮響如別路斜陽京口樹他鄉明月洞庭船挽得瑤弓射飛虎賜將宮錦繡盤螭舊館空餘秦地月古壇猶似漢宮秋皆琅然清圓可誦也

自勵

團團匣中鏡皎皎流素光鑒物無遁形妍媸安得藏經時苦昏翳游塵漫飛揚顧此三歎息胡為失其常拂拭

去瑕垢精采復煌煌衆污不可染持已貴自臧恒當慎
夙夕惕然以自防

哀義士周益詩

步出崇明城遙望城南里天寒飢鳥啼日暮北風起綠
楊何蕭蕭衰草生故壘傍有三尺墳葬此千載士昔時
從戎馬一身赴邊鄙但全手足愛百戰何足畏崎嶇越
關山辛苦乃云逝傷哉有斯人薄俗誠所愧遺風何凜
然聞者皆墮淚

贈伍子正還巘山舊隱

積翠羣峰出盤雲古洞深澗花春帶雨山木晚澄陰
猿鶴多年別江湖萬里心還攜謝安妓歸去一登臨

秋初有懷呈曾侍講彭修撰二公

律應清商動涼生大火流梧飄金井露鴈度玉門秋爽
氣消殘暑砧聲報遠愁佳期七夕近乘月却登樓

榆林直宿有懷邵菴學士對月之作

榆林春夜漏聲遲獨憶奎章對月時翠袖清歌看駐輦
彩箋紅燭坐題詩連雲尚有青山在夾路應多綠柳垂
北望窮荒凋落盡昔年文物倍增悲

舟過孟城

画船撾鼓過孟城兩岸桃花春水平今夜湖中好風景
直須看到月三更

淮安別回御史

遠別悠悠鄉夢頻逢君况是異鄉春可憐湖畔青青柳
又折長條別故人

王直 十六首

直字行儉泰和人永樂甲申進士選庶吉士歷
翰林修撰侍讀進學士擢吏部尚書加太子太
保進少傅兼太子太師卒贈太保謚文端有抑

菴集

李原德云抑菴詩文清緻追古作者 錢原博云王公含咀英華出入經史文辭典雅超邁今古 沈景倩云王文端以庶常

為文皇所眷不數年召入內閣書機密文字授修撰駕幸北京太子監國與黃淮楊士奇三人輔導儼然宰相職矣帝再幸北京公扈從進侍讀仁宗朝為侍讀學士又以庶子兼侍讀學士宣宗時進少詹事兼侍讀學士英宗即位充實錄總裁尋進禮部左侍郎兼翰林院學士正統六年禮部闕人始命出部治事自此以後雖拜吏部尚書加保傅不復兼學士矣公墓志本傳中云公自言西楊不欲我同事內閣出我理部事據此則公在內閣凡歷五朝為東里所擠始出理部事其初固閣臣也而海鹽鄭氏豐城雷氏太倉王氏紀述宰輔更不及此公何邪 鍾

廣漢云東王諸體

斐然微溢目

詩話東王不得爰立西楊之力也觀其撰東楊文集序云直之去翰林惟公深惜之而反為忌者所病夫士之進退出處有命焉非人力所能勝奚以病為哉又題東里翰墨卷云楊氏與王氏世有連子竊祿翰林從先生者三十七年教益多矣予之事先先生負恃親愛於凡所當言者盡言不諱則有之非理而諛語則奚敢後予去翰林或謂出先生意蓋言語以為階豈苟觀側聽者固能知其情邪而子實不自知也釋其辭雖隱而情事躍如矣特其人長者故為東里作傳止揚其善已君子哉若人乎其論詩有云詩者志之所發也方其動於中而形於言雖各有自然之機然非取法於前人而欲從容中度不失其正亦難矣覽集中詩未遽出西楊下顧元美元瑞諸公品騭詩家甚廣獨不及焉何與

騶虞詩

有靈者獸是曰騶虞環滁之山以潛以居其靈維何莫
之與匹既立其文而白其質猊首虎軀尾參於身一日
千里孰知其神振振仁厚不踐生草彼物之生亦不以
飽維天生之亦自天成聖明之世為祥為禎維今天子

道德純至肫肫皇仁遠邇一視昭事上帝曰敬曰誠乎
於下民皆樂其生皇天惟親兆民胥悅神祇效靈騶虞
乃出石固之山榮光燭天百獸從之其行蹀躞彤軒文
檻帖然自致翼以祥飈獻于天子天開日晶慶雲垂英
百僚歡趨騶虞在廷騶虞在廷實為大瑞龍馬神龜乃
同其類昔在太宗文德武功騶虞之來頌聲颯颯維今
天子祖武是繼騶虞復來以昭盛治穆穆聖明天眷滋
彰萬世之隆萬世之光小臣作詩以歌盛美播之韶鈞
垂示無已

豔歌行

翩翩春歸雁秋至復來翔如何遠游子兄弟各異方山

川何迢迢參辰夜相望寒風日以厲零露結為霜空林
靜無人但見明月光徘徊不能寐徙倚臨中堂睠彼南
飛翼故鄉安可忘

吳城山阻風雨

泊舟吳城山勝覽斯為最登臨記曩昔正與匡廬對茲
晨一寓目烟雨森晝晦莫辨咫尺間安知天地外微茫
彭蠡澤洶湧百川匯長風翻洪濤歛見蛟鼉背夙聞垂
堂戒行止焉敢昧

發儀真道中登岸延覽憶前行曾侍講王修撰

舟行苦澶迴登岸曠心目天清浮雲卷野秀新雨足澶
漫衆流會杳靄羣山綠風暄花意亂日暖鶯聲續却憶

明詩卷十八
九
同心人無由踵前躅

題山水贈楊熙節

郭純永嘉人善画自疇昔興來展豪素滿眼絢金碧永
樂年中獨擅場拜官得在內作坊時時承詔恣點染九
重出入生輝光洪熙改元初進位閣門使常言酒後妙
入神傾倒壺觴不知醉供御之外頗自珍一筆豈肯輕
與人忽持此幅來贈我令我坐憶江南春江南何處最
奇勝錢塘西湖誰與竝諸山遠近翠若圍豔杏天桃色
相映橋上行人駿馬過橋邊桂楫揚清波岳王祠下喬
木老林逋宅前芳草多春光如此佳可賞遠道迢迢心
養養朝回看画悄無言夜雨寒牕神獨往山陽義士真
好奇平生脫略誰得羈昨日到京師秋風露華白訪我
小瀛洲暫作神仙客飄然復往不可留拂衣欲向東南
遊題詩卷画贈爾去相思定倚新城樓

題夏珪風雪江村圖

江天漫漫雲氣黑江風蕭蕭雪花白荒村古道人跡稀
惆悵津頭遠行客黃蘆低折沙草平遙望不見長安城
蹇驢凌兢縮如蝟鞭驅還欲西南征四山冥濛日應晚
辛苦羸僮未遑飯深林歸鳥棲已定茅屋人家去猶遠
吁嗟乎夏珪之筆凌范寬滿堂凜凜生晝寒卷簾看罷
重歎息歲晏高歌行路難

題周永新所画山水

括蒼周永新作画有奇趣京師為我寫此圖彷彿鄉園
昔游處我家舊住西昌城西昌山水天下清金華武姥
最奇絕連峰疊巘高崢嶸仙宮梵刹在其上寶殿珍樓
屹相向白象青猊不見過翠鸞綵鳳猶聞唱逶迤岡阜
瞰滄洲下有長溪萬古流越王臺荒莎草合龍君廟冷
松篁幽平沙漠漠行人小巖藹林霏沒歸鳥石潭魚艇
自夷猶茅屋人家更深杳我昔捫蘿上紫岑振衣獨立
清煩襟天台微茫玄圃闊蒼梧縹緲瀟湘深山中仙子
顏色好坐閱年華後天老便擬相攜賦遠游萬壑千峰
拾瑤草塵事羈留竟獨歸別來幾度見春暉逢人尚說
彫胡飯當暑猶懷薜荔衣只今容髮半衰朽事業文章
復何有况聞荆棘長芝田側望天涯謾搔首高堂看画
增慨慷如此好景非尋常君恩未報心尚在何時乞身
歸故鄉

顧進士所藏画虎

趙廉画虎名天下好事求之不論價披圖忽然見此物
坐卧雖殊貌閒暇岡頭樹綠風氣涼下有流水聲浪浪
蕭條古路絕行迹但見藜藿如人長深山麋鹿可充腹
莫向田家取黃犢禍機一發戕爾軀豈若安常一生足

秋江獨釣圖

蒹葭浙瀝秋雨霜明月照水天蒼茫扁舟靜夜泝空闊
驚起沙邊鷗鷺行釣車不用置在傍此心寧羨鯉與魴

扣舷獨往歌滄浪歌聲激烈增慨慷山中之人遙相望
謝庭循自画秋景

洞庭八月秋風早楊柳蒹葭漸應老柳下茅堂遠市塵
寂寞閒門對幽島居人無事不出門林深地僻如荒村
門前道上車馬絕過雨蒼茫空蘚痕江清水落沙石出
水底渾疑見鮫室鷺鷥鸕鶿皆有情唳喋喧呼亂晴日
我家故業連滄洲贛水文溪遶舍流圖中景物渾相似
見之令我增離憂君今善画得供御下筆縱橫有神助
何時爲埽寰瀛圖一葉凌波向南去

帝京篇贈鍾中書子勤

曙闕霜

一作嚴

鐘啓宵衣玉

一作促

漏催雲移宮扇靜

一作徹

風引御

香來劔履羣公侍簪裾萬國陪小臣瞻盛美稽首頌康
哉

雪

大雪下龍墀蓬萊曙色

移一作促

曙輝

光通九華殿花滿萬年

枝賦擬梁園作歌憐郢曲詞西山臨魏闕相對玉參差
月下對酒

萬里浮雲盡孤城畫角殘月從今夜滿人在異鄉看隱
隱關山遠淒淒風露寒客愁難爲減應賴酒杯寬

景陵挽歌

靈馭陪仁考仙遊侍太宗珠丘連翠殿玉匣闕玄宮海
宇攀號切天庭陟降同遙知六龍駕長度五雲中

得兄行敏書知在臨清將北上

嶺外三年別天涯萬里迴書從今日到船向幾時開落
日關山遠清秋鴻雁來重陽看漸近同醉菊花杯

雨

野迴雲容黑汀長雨氣寒春隨花片減愁向酒杯寬亂
水通流急孤舟逆上難白鷗渾自得來往任風湍

章 敬二首

敬字尚文會稽人永樂甲申進士改庶吉士授
刑部主事歷員外郎中改吏部擢南京禮部右
侍郎有質菴集

詩話侍郎兩使南交却金不受以
清德聞其詩不費雕鏤間合規度

鄉山圖為魏仲房題

連山際東溟層巒儼天設陽林耀青葩陰厓餘積雪原
田莽迢遞烟霞互明滅時菊萎舊裳蒼苔闕行轍雲谷
杳難尋澗芳那可掇懷故念易盈覽物意彌結游目愜
心賞幽期緬乖缺一為莊舄吟浩歌徒激烈

長安雪夜歸興

半生歲月老幽燕鏡裏蒼顏豈似前曾道休官身便樂
夢書封事乞歸田

周 忱二首

忱字恂如廬陵人永樂甲申進士改庶吉士授
刑部主事轉越府右長史超拜工部右侍郎巡

撫江南陞戶部尚書改工部卒謚文襄有雙崖

集王行儉云公詩文出入唐宋諸大家

詩話進士改庶常相傳自永樂甲申始是科命解學士縉選得二十八人以應列宿文襄自陳年少乞讀中祕書時人謂之挨宿云攷洪武乙丑有楊靖徐孟昭郭資皆以庶吉士稱大誥亦載庶吉士廖孟瞻以受賕誅則又在乙丑之前矣至戊辰年解縉亦為中書庶吉士益信不始於永樂初也其後文襄填撫江南凡二十二年以經濟名世詩非所長然性好儲書其藏室詩云羣經既並蓄百氏無弃捐所至每克棟來往勞車船嗜學如此宜其吟諷亦未遠遜二十八人也故彭惠安贊云學博而邃沛乎有容二十八宿誰能右公

徐州過桓山宋司馬桓魋之墓

愚哉宋司馬仲尼安可輕欲害其如何不知天所生此山昔葬骨廢穴尚留名宿土消飯含飄風散精靈日中狐兔集夜半鷓鴣鳴當其始建時久遠勞經營荷鍤萬夫集石椁三年成詎知百世下牧豎來縱橫君看孔林

樹千古猶青青

尋天台李道士齋

瑶草迷行徑丹臺近赤城山川遙在望雞犬不聞聲谷靜松花落橋橫澗水鳴雲間雙鶴下疑聽紫鸞笙

李昌祺二十七首

昌祺名禎以字行廬陵人永樂甲申進士選庶

吉士擢禮部郎中出為廣西左布政改河南有

容膝軒草運覽漫橐李時勉云李公詩有典則温厚者有流麗痛快者有春容浩瀚者 陳德遵云

公於詩本之以理克之以氣故其雅澹清麗宏偉新奇無所不備不必遠較於古就今而論千百之中不過數輩而已 鄭德新云先生詩清新富麗音調爽澈隱然有一唱三歎之音 蔣仲舒云方伯詩亦清新要非作手 昌祺富於才情多所結撰效瞿宗吉剪燈新話作餘話一編借以寫其胸臆其歿也議祭於社鄉人以此短之乃罷白壁微瑕惟在閒情一賦其然豈其然乎

詩話方伯務謝朝華力啓夕秀
取材結體頗與段柯古相似

題山水小景

野外少人躅值此佳日遲偶與二三友游觀賦新詩青
松藹繁蔭碧草含華滋逍遙恣言笑童穉亦娛嬉濟濟
炫春服悠悠詠清沂茲歡恐難再興盡以爲期

湖山佳趣卷

宦遊愜深好乃在名勝區山水自足適况茲職文儒橫
經有餘閒逍遙出通衢春服各已成遂與童冠俱徘徊
恣言笑登陟忘飢飭晴鳶戾層空弱藻翻文魚至理與
景會天機獨吾娛悠悠仰川上眷眷懷舞雩詠歌返鬢
舍高興誰能踰

徐道士安處軒

塵氛旣屏絕氣宇亦澄鮮心恬境逾寂慮遣情自捐結
宇依層巖開軒俯重淵遙林含宿雨古樹帶秋烟落花
晚成積歸鳥夕知還習靜泯衆累守默息萬緣清虛固
其性聲利豈所便智黜道乃得朴返真斯全將隨鳳鸞
侶以引龜鶴年

經浯溪讀元結大唐中興頌

半生念浯溪鐫鑿有遺跡揚舲沂湘水登臨暫來即穹
崖倚層雲奇險自天闢漫叟詞旣嚴顏公筆無敵鬼神
屢呵護風雨長洗滌忠槩儼尚存冰銜猶可識端容斂
襟讀感慨重心戚誰畫靈武謀大物取何亟唏嗟中興

業諒重君子惜遂巡解舟去回顧三歎息

蝻冢

七月月生魄蝻出溱洧疆始焉學躍跳倏忽羽翅長所
過赭郊垆矧復遺稻梁坐令飮飽腹立化饑餒腸督民
殄斯類晨夕紛遑遑隳突羨壟畝炬火明山岡燎焚弱
質儘撲擊微骸僵卒夫載朽茵絡繹持筥筐穿穴掩腥
穢作冢官道傍罪浮彼破鏡雖死安能償蝮蛇實搖處
已疾傳醫方蜜蜂誠小物亦解奉其王畜蠶必吐縷世
賴克衣裳畏蚊恐嚼體幬幕席與牀青蠅奚足憎赤蠱
應可防編竹蟻知報勤誦螢聚光致雨蜥蜴驗起痺全
蝎良原性殊善惡稼穡咸無傷獨茲口吻酷黍稷爭死

戕乾坤動物夥去爾庸何妨吾將告真宰投畀魑魅鄉
昆蟲永無作歲歲歌豐穰

觀啓母石

夙負山水癖苦乏幽討緣幸茲崧與少秀色當眼前公
餘陟峻岡忽覩石一卷特立四無鄰觚稜不相聯云是
啓母身化在郊墟孺呼之乃擘裂啓出仍完全幻語本
荒唐昉見淮南篇遐想覆載間滄桑屢更遷安知運代
移墜彼千仞巔厥理誠可推賢達固釋然矢詩正妖譌
昧者庶或悛後世有豪傑為我焚其篇

端午日游少林寺

少林聳峒堯有路達蔥嶺半生懷勝槩老乃踐真境緇

流遠見迓偏袒仍露頂升高縱遐觀頗覺癡緣屏蒲風
翻卷帙艾色侵衣領掇蔬僧具供飲騎童汲井自拈清
淨香作禮爇古鼎超超昔神師順寂同溟滓而於片石
上留此不滅影竺夏雖異轍皆貴能猛省寒巖許分坐
禪定畢餘景

送楊郎中催馬草還京

大梁據中土自昔風氣旺北邙殊蜿蜒太室極雄壯黃
河貫其間浩浩恣奔放四野開平行桑柘綠相鄉丁男
事耕耨姑婦治絲績菽麥盈倉庾醕醴溢盆盎近歲頗
凶屯旱嘆缺農望念茲飢餒餘十室九鰥曠長貧負租
稅遠役困夫匠督芻實賴公區畫咸適當深體堯舜心
推仁憫彫喪叱咤尚弗忍矧肯施鞭杖愧余謏劣才旬
宣乏善狀竭力奉寬條庶減疲瘵恙贈別陳時艱冀君
徹卿相

擬古

吾觀日與月乃是陰陽精彼升此攸降循環有常經萬
方仰臨照元良則其明離纏遂晦蝕惟辟修德刑玄象
雖緬邈人當思戒懲

夏末偶尋洞惠道院

曉起涼月淡絺衣坐肩輿灑然塵慮豁遂即道者廬蕭
條殿廊存亭軒化荒墟山門憩樵農蘚砌鹿豕趨雷傾
有墮瓦樹伐無遺株仙家尚消沉沉况乃俗士居蓬萊屢

清淺此事諒弗虛吾聞至人言一氣運化樞莫窺機纖
微孰外定數拘通由饑亡命載以賄喪軀榮華豈久在
役智悲羣愚

丙寅初度作

余生如稗松由寸望百尺既承雨露滋亦受霜雪積蹉
跎踰七十勤苦曾備歷誤蒙明聖知謬忝中外職顧已
慚菲薄於時乏裨益處盈虧必隨履泰否斯即至理諒
在茲昧者固弗識叩閭乞殘骸休退恩旨錫遂令犬馬
軀獲返田野跡長揖画省僚重負從此釋今辰屆初度
廚傳仍岑寂傍人競嗤笑窮約猶曩昔妻孥頗愧赧而
我固悅懌平生守儒素晚節敢變易回思永樂初歲月
類梭擲同年四百餘多已在鬼域存者纔十輩猶被利
名役迂踈獨何幸林下得偃息遺榮遂安閒養靜忘跛
蹇游鱗泳清波羈鳥斂倦翼負非吾所憂病豈吾所戚
過吳門次薩天錫韻

七澤三江通甫里楊柳芙蓉照湖水閭門過去是盤門
半掩珠簾画樓裏薜蘿生遍鴛鴦沙東風落盡棠梨花
館娃香徑走麋鹿清夜鬼燈明絳紗三高祠下東流續
真孃墓上風吹竹西施去後屨廊傾歲歲春深燒痕綠

高道士所画山水

伊誰丹青擅能事画出羣山與山似樹杪如聞雪瀑泉
林間疑有雲門寺杖藜橋上知何人抱琴可望不可親

高師指點笑相語我昨圖成殊逼真

題周參政所藏山水小景

天壤有異境描摹付良工佳山與秀水幻置軒窗中村
村陌陌皆勝處花竹園林饒雅趣過鳥疑飛却不飛行
人欲去何曾去松坡竹塢壘更重雪瀑倒濕青芙蓉岡
巒島洞盡在眼樵牧耕釣俱可容九曲溪流漾清泚荒
渡斜陽見舟尾石上吟翁鎮日留欄前眺客今年倚我
觀風物似杭州樹木雲霞分外幽豈必西湖有奇勝展
圖高興亦悠悠

題秋塘鵲鷓圖

秋風淅瀝秋塘淨菰米沉波荷折柄翻藻魚跳水氣腥
采菱人散歌聲定蓮莖嫋嫋綴枯房上有雍渠立晚涼
翠蓋裂殘渾改色紅衣落盡尚餘香圖中頗得周詩義
未論工拙先觀意不寫和鳴寫急難人間誰獨無兄弟
嗟我龍鍾命弗齊今年同氣委黃泥白頭徒重鵲原感
展卷他鄉忍淚題

留魯山縣

黎庶凋殘甚惟餘朴儉風名因元子重地本魯王封撫
卹無賢令流移有情農誰將于蒞曲歌向五雲中

新野即景

村暗濛濛雨流渾淺淺溪菊花長帶濕豆莢半沾泥野
迴居民少林昏去路迷自投新野界蒿草與人齊

周原幽居

山色蛾眉秀江流燕尾分
亂蟬吟落日獨鶴引歸雲
黃葉溪邊樹青帘雨外村
興來留客坐隨意倒芳尊

早發小孤山遇風

湖盡江逾闊舟窮路若迷
垂楊春寂寂芳草雨淒淒
漩水鼃鼃窟平沙鴈鷺堤
風波隨地有何處可幽棲

送陳生歸吉水赤岸

清砧兼落葉總是別離情
去路千程遠歸舟一葉輕
秋雲連樹暗寒日映川明
亦有滄浪興何時共濯纓

送周秀才遊長沙

迢遞長沙道蕭條晏歲遊
亂山黃葉寺孤櫂白蘋洲
夕鳥衝船過寒波背郭流
毋論卑濕地賈傅昔曾留

送戴教授北行

別路三春雨行舟五兩風
花香隨路減柳色上衣濃
共是青雲客先成白髮翁
離情如逝水萬折亦朝東

新安謠

三首

新安野老髮垂肩說著先朝淚
泫然洪武初年真少事
幾曾輕到縣衙前

垂老頻逢歲薄收秋租多欠賣耕牛
縣官不暇憐飢餒
喚拽官車上陝州

當夫當匠子孫亾田地荒蕪戶有糧
昨日迤西蕃使過
盡驅婦女趕牛羊

宜陽道中

綠陰重疊鳥間關
野棗花香宿雨殘
天遣浮雲都捲盡
教人一路看青山

嵩縣遇端午

老大偏多故里心
一逢佳節一沾襟
誰知此日菖蒲酒
又在山城獨自斟

胡謚一首

謚字廷慎鄆縣人永樂甲申進士歷官山東參

政

秋思

遠客尋常歎索居
秋來懷抱意何如
高城月白砧聲急

古戍霜清木葉疎
塞馬正肥秋首蒼
江蓴空憶舊鱸魚
故人迢遞天南北
不寄相思尺素書

嚴貞一首

貞字頤正嘉興人永樂甲申進士知景陵縣

詩話頤正詩僅存柳州城樓一首浙音彙編謂官至雲南右布政使攷雲南舊志布政使題名記有嚴貞係寧波奉化人乃永樂戊戌進士別是一人也

和柳子厚登柳州城樓

獨上層樓望海天
異鄉愁思正茫然
溪雲暝帶枕榔雨
野日晴銷薜荔烟
百粵湖山通絕徼
半江菰米熟秋田
舊游別後多零落
目斷滄波祇自憐

明詩綜卷十八上

明詩綜卷十八下

小長蘆 朱彝尊 錄

淮陰 陸志謹 緝評

魏 驥 一首

驥字仲房蕭山人永樂乙酉舉人由松江訓導累官南京禮部尚書致仕卒年九十有八謚文靖有南齋前後集

鄭室甫云公性好吟詠矢口適情不求雕飾自然雋永

靜志居詩話文靖仕宦四十年官階二品年近百齡可稱嚮用五福其文極醇雅詩雖非專長亦頗蘊藉

秋興

秋高風露涼明月滿庭戶輾轉不能眠起縱階前步美人天一方何時遂良晤相思怒中腸坐覺年華暮

柯暹 一首

暹字啓暉一字用晦池州建德人永樂乙酉年十七領鄉薦明年預修大典尋選入翰林知機宜文字進玄免詩授戶科給事中坐言事出知

永新吉水二縣歷官雲南按察使有東岡集

靜云東岡詩文奇崛出人意表清瑩無滓 吳與儉云用晦詩思深沉而幽永 宋爾章云東岡詩清淡古雅得意處追蹤盛唐

九日次黃學士韻

客塗逢九日景物為誰賒此地已無酒故園空有花翠微亭下路采石驛邊槎未卜重過日臨風獨歎嗟

林真 一首

真字汝寔號木菴莆田人遷居閩縣中永樂乙

酉舉人以薦選庶吉士侍書經筵出知慈溪江

寧宜興三縣

粵王臺

屠龍人去幾時歸空有高臺對夕暉回首舊時歌舞地年年春草鷓鴣飛

林環 一首

環字崇璧莆田人永樂丙戌賜進士第一授翰林修撰陞侍講有綱齋集

詩話侍講未第之先縱酒自放雖在玉堂詩無臺閣氣

題林泉清致

春山佳氣多白雲滿芳樹幽徑絕塵蹤落花映深戶微

雨灑林落東風長蘭亭之子招不來滄洲日將暮

陳全 五首

全字果之長樂人永樂丙戌賜進士第二授翰林編修歷侍講署院事有蒙菴集

詩話果之五言專法韋柳

夢游匡廬山

夢寐游匡廬晞髮五老峰長天散氛翳削出金芙蓉林谷轉深邃溪迴路彌通澄江波澹澹霽日花濛濛陰澗長瑤草陽厓明藥叢樓臺霄漢上雞犬煙蘿中杳渺逢羽人相期躡仙蹤覺來玉堂迴彷彿聞疎鐘丹梯如可接共汝巢雲松

送陳廷器歸長樂

置酒新亭上親賓儼成行蘭肴雜肥鮮綺席羅瓊漿顧茲繾綣情樂飲各盡觴中筵忽不懌援琴撫清商絲桐易為感離思擾中腸驪歌首前途僕御促行裝故鄉渺何許路繞川原長願為晨風翼送子東南翔

送叔韜兄歸長樂

攜手出都門悵然千里心悠悠河橋上送子歸故林川原翳衆綠灌木澄幽陰滄波渺離思黃鳥鳴好音吾家南山下白雲澹遙岑別來幾何時歲月忽已深誓將從君歸焉能辭華簪遙持一書札因之南飛禽

挽蘇伯厚先生

寒暑有代謝節序忽蹉跎夫子乘運化悽愴將奈何生
存簪組榮死歿歸山阿向來歡娛人零落亦已多西日
不返照逝川無停波懍忽魂若存感慨成悲歌

送人尹江右

窮冬正蕭索離思苦息息風雨孤帆別琴尊幾日同雪
晴淮水急雲盡楚天空花縣絃歌暇題詩寄塞鴻

謝瑾一首

瑾字庭蘭鄞人永樂丙戌進士除刑部員外郎
歷郎中出知平陽府遷廣西按察使有蝸濡集

李杲堂云蝸濡集於腐
題爛句中時作驚人語

黃陵廟

黃陵帝子昔嬪虞絃斷南薰鳳影孤紅盡淚痕傳翠竹
青來魂氣隔蒼梧秋風衡岳沉鴻鴈暮雨湘江怨鷓鴣
明月三千年後夜九疑雲冷夢應無

曹閻一首

閻字冀成江夏人一云黃巖人永樂丙戌進士官監察

御史

詩話侍御楚產登科錄可考而謝方石采其詩入赤
城集中期東里一篇情致纏綿髣髴謝監南樓風調

期楊士奇不至

羈旅無友生何以慰懷思有客筮適我芳辰以為期深
叢鳥雀喧窮巷牛羊歸相候清路傍冠佩來何遲我肴
既云具我酒亦已持雖無德與女寫心良在茲子寧不

我即佇望增歎歎仰觀列宿行羨此明月輝令德衆所慕彼留知為誰諒無好賢誠空負緇衣詩

尹鳳岐 一首

鳳岐字邦祥吉水人永樂丙戌進士官翰林侍

講

送兄廣東參政應奎

价人藩閩寄旬宣五嶺南行遠著鞭曉日紅亭留別酒
秋風黃葉下瀧船青連橄欖千家雨黃觸枕榔萬井煙
珍重平生清節在不妨引滿酌貪泉

苗 衷 一首

衷字秉彝定遠人永樂辛卯賜進士第二累官

兵部侍郎兼翰林院學士入直內閣進尚書贈

少傅謚文康

楊思敬東郭草亭讌集

芳春倏云暮暇日鳴玉鞘羣公夙有約駕言適東郊冷
卿遠相迎會此文字交開筵俯亭沼次第陳觴肴疎花
粲檐前好鳥鳴樹梢睽茲百物遂樂飲恣歌嘲

詩話鴻臚卿大興楊思敬築草亭於東郭自正統丙辰始歲會文學名
流極觴詠之樂自後遂為都城飲餞之地西王尚書詩所云柳陰嘶過
馬花塢駐行車者也其後又於崇文門外十里許據渾河之支流有地
二十頃以二頃為南園鑿塹環之繚以重垣中植桃杏諸果雜詩花卉
池種芰荷芟艾退朝邀諸鉅公燕
集其地則東王尚書有序紀之

錢習禮 一首

習禮名幹以字行吉水人永樂辛卯進士選庶

吉士除簡討歷侍讀學士陞禮部右侍郎卒謚
文肅有應制集詞垣續橐歸田橐

詩話王元美以錢文肅六典文衡為明盛事考文肅永樂甲辰業為會
試同考官宣德丁未再入會場分考而正統丙辰己未兩次殿試皆充
讀卷官辛酉復為順天主考是主文衡者
十次矣其詩雖非作家然亦無塵室氣

新橋和余簡討韻

初月生遙甸長流遵在渚方舟泝長河宵分及前侶維
梢戒孤征懸燈照清語秋衾夢不成隕籜紛如雨

林衡一首

衡字宗器閩縣人永樂辛卯進士御史

賦得江村片雨外送沈空同

片雨江村外霏霏暗去程一作細沾芳一作行草濕遠入斷煙

輕歸鳥愁邊沒離情別後生不堪凝望處迢遞失關城

熊槃二首

槃字元節吉水人永樂辛卯進士榜姓胡除御

史出為廣西按察使調廣東宣德初擢大理卿
巡撫兩浙及蘇松諸郡陞南京都察院右都御
史召掌院事兼署刑部事卒於官有芝山居士

集

雨後江行

早出餘杭郭微茫曉色開画船江上別綠樹水邊迴酒
為離人勸詩因細雨催故人凋謝久惆悵不勝哀

塗中述懷簡張憲副用中李布政昌祺

北闕黃門客南宮粉署郎新詩凌鮑謝妙翰繼鍾王
直趨青瑣籬書向玉堂遭逢懷聖主眷顧倚儲皇
超擢之南越旬宣共一方分符來上苑持節去遐荒
匹馬炎蒸路雙旌瘴癘鄉豺狼應遁跡恩澤已宣揚
桂嶺開秦塞蒼梧拓漢疆野人疎制度蠻俗少冠裳
曉白溪多霧冬青樹不霜四時榕葉暗五月荔支香
交誼憐君篤鄉情媿我涼別離寧有恨會合豈能忘
傾蓋酬知己分簪祇自傷明朝故園雨回首思茫茫

杜桓一首

桓字宗表金華人永樂辛卯進士官趙府紀善
有良菴集

北山草堂和韻

厭彼塵俗喧愛此清幽景雨餘山色佳日落松陰冷
不見草堂人白雲三萬頃

馬鐸一首

鐸字彥聲長樂人永樂壬辰賜進士第一除翰
林修撰有玉巖集

送徐主事孟晞回澄江

京華二月柳垂絲送子南行惜別離陌上看山愁對酒
風前握手倦吟詩雲連鐵甕人煙迴月滿丹陽客
擢遲粉署嚴程應待汝莫因鄉國緩來期

林誌一首

日詩經卷六下
七
誌字尚默閩縣人永樂壬辰賜進士第二除翰林編修歷侍讀有部齋集

菊莊

別業依南山投閒忽成趣白露朝欲晞黃花滿籬戶餐英慨前修采之恐遲暮苦無三徑資眷此歸來賦

鄭閻一首

閻字公望閩縣人永樂壬辰進士授安陸州學正改無為州終廣信府學教授有抑齋集

懷林鴻

寒月照古樹朔風吹城樓如何咫尺居致我千里愁俯景暫自遣浩歌誰為酬思君若逝水朝暮長悠悠

陳鎰一首

鎰字有戒吳縣人永樂壬辰進士官至榮祿大夫太子太保都察院左都御史謚僖敏有介菴集

詩話僖敏開濟之才韻語非其所務湯尚書潛菴稱其文有組舞磬控之樂顧遺集罕傳予從其裔孫彥瑜所見之錄詩一首

懷慶道中

風卷塵沙驛路迷人家遠近樹高低如何河北風光別春半猶無一鳥啼

陳循六首

循字德遵泰和人永樂乙未賜進士第一除翰林修撰累官戶部尚書少保兼太子太傅華蓋

殿大學士英廟復辟戎鐵嶺尋放還有芳洲集

詩話裕陵復辟吳人盛誇徐元玉社稷之功然奪門二字豈可示天下後世李文達之言當矣予嘗見少保訟冤疏手稟具陳元玉之讒斯亦纂國史者所當知也少保詩絕意規摹饒越石清剛之氣

開平

灤河河北開平府云是前朝故上都萬瓦當年供避暑
孤城此日事防胡龍岡夜照烏桓月鳳輦時巡敕勒區
何處登臨最愁絕李陵臺上望平蕪

客寓懷來有詔自行在達京師候騰黃不至有感
往時載筆侍清班玉帳頻先覲聖顏一自病中離闕下
頓分天上與人間近聞頒詔先歸國久候騰黃未出關
咫尺日畿誰報喜西風目斷白雲閑

野望 二首

遠違車駕踰三月久抱衾裯滯一州南郭幽居嗟影獨
西風落日使人愁天空絕塞飛鴻度草滿平原獵騎遊
何似桑乾南下水萬山深處出盧溝

欲就邦人詢往事百年耆舊已無存爰啼暮雨佛山寺
鶴怨秋風香水園萬仞倚天瓊岫小一泓迸石玉泉温
温水在懷來西北三十里 太平自是多耕牧禾黍牛羊日滿村

鷗閣

縣城南面開高閣正俯清江對翠微名勝尚憐如往日
登臨常想到斜暉閣中諸老仍何在水上羣鷗只自飛
茅屋龍洲終遜此何年重許叩林扉

東軒

半畝溪山舊卜居往來塵跡自應疎
春風門巷花開後曉閣軒窗日上初
頻理琴尊留上客閒攜燈火讀遺書
時平隱逸皆徵用丹詔行看下玉除

高穀一首

穀字克用揚州興化人永樂乙未進士累官少
傅兼太子太傅工部尚書謹身殿大學士贈太
保謚文義

送倪廷用致政歸嘉興

青雲遺宦轍白首賦歸田舊著宮袍卸
新裁野服便草堂留月色花徑隔塵緣
陶令門前柳春來好繫船

牟倫一首

倫字秉常宜賓人永樂乙未進士任監察御史
以諫謫甘肅

留別京師諸友

行行策馬去皇畿落木高原獨鳥飛
天上故人青眼在蜀中諸弟素書稀
秋風故隴雲連棧夜月清笳霜滿衣
白髮蕭蕭身萬里不知別後竟何依

鄭珞一首

珞字希玉侯官人永樂乙未進士選庶吉士改
授刑部主事出知寧波府有訥菴雞肋二集

送高時旭還閩

祖帳連芳草征帆挂夕曛鄉心閩海月客夢楚江雲候
館雞聲早平沙鴈影分懸知霄漢上早晚薦雄文

陳輝一首

輝字伯煒閩縣人永樂乙未進士任貴州按察
司僉事陞廣西副使有琴邊清唱

旅次武林期叔剛修撰不至

寓宇閔幽寂羈懷轉淒其况茲梅雨候值此麥風時閒
登溪上樓悵望吳天涯長風卷潮來倏忽銀屋移潮水
尚有信我行豈無期緬懷同心人惻然起遐思

周敘一首

敘字功敘吉水人永樂戊戌進士改庶吉士授

編修歷修撰侍讀陞南侍講學士有石溪集

明初館閣莫盛於江右故有翰林多吉水朝士半江西之
語而文集流傳自東里西墅外可觀者絕少如石溪又其靡也

送袁欽誠

少壯辭家去從師千里遊雨深廬岳樹天接漢江流夜
誦分漁火朝吟倚客舟遙知重會日春滿帝王州

金誠一首

誠字誠之番禺人永樂戊戌進士授工部主事
改刑部有集

江行

一作王佐一作董良
史今從韓迪粵音

江水悠悠江路長孤鴻啼月有一作帶微霜十年蹤跡渾無
定莫更逢人問故鄉蔣仲舒云可仿唐人渡桑乾之作

黃閏 一首

閏字期餘信豐人永樂戊戌進士有竹居集

擬唐人長安春望 一作安福 謝復古詩

南山晴望鬱嵯峨上苑春游玉輦過天抱帝城雙闕迴

日臨仙仗五雲多鶯聲盡入新豐樹柳色遙聞太液波

漢主離宮三十六樓臺處處起笙歌 宗子相云全 是盛唐風調

晏 鐸 一首

鐸字振之富順人永樂戊戌進士改庶吉士授

福建道御史以言事謫上高典史有青雲集 李時

遠云振之詩溫柔 典麗自是作家

詩話振之采明初詩為鳴盛集惜未之見花月金陵十四樓之句盛傳 於時或云在宣德十才子之列今其詩存者甚少格調平平僅與海寧

三蘇伯仲按俞憲登科考名在永樂十六年李騏榜三甲第三十五人 何出光蘭臺法鑒錄稱是永樂十三年進士十五年由庶吉士授福建 道御史巡按兩京畿山東以建言謫上高典史吾鄉沈孝廉德符野獲 編謂是永樂二十二年庶吉士傳聞異辭當以登科考為正也黃才伯 撰翰林記謂永樂甲辰科庶吉士不可考題名止書四人其一方復乃 壬辰進士王道方懋德甲辰登科錄竝無其人弇州別集載六人野獲 編云其實二十人然六人之外所增益者如劉濬張觀乃壬辰榜周安 乃乙未榜沈善李敬木訥曾泉盧璟及鐸乃戊戌榜萬碩王璉乃辛丑 榜初疑孝廉偶誤及閱劉文安所撰劉寶傳稱實從周學士功敘學書 經用以舉進士時宣宗皇帝方隆儒術合前科丁未是科庚戌後科癸 丑進士共選得二十八人比列宿數以先朝選士亦嘗若是也然則合 先後數科同選庶吉士實始於永樂間矣孝廉熟精掌故日讀一寸書 考證極詳是非亦不謬 惜其書未刊行於世

九峰山行

曲徑沿流上下蒼苔白石磷磷落日唯聞啼鳥空山更

少行人

劉 鉉 一首

鉉字宗器長洲人永樂初以善書徵入翰林中
庚子舉人授中書舍人陞兵部主事擢翰林侍
講累官少詹事卒贈禮部左侍郎謚文恭有假

菴集

李原德云劉公詩古澹春容自有餘味 吳原博云文恭著作
不以險怪爲工往往於和平簡澹之中寓溫純典雅之意
徵仲云公爲詩一字不安更
數月必改定其矜慎若此

送杜亞卿赴南京

一尊傾罷雨瀟瀟客思離情總未消廿載禁林同侍講
五更青瑣共趨朝西風鴻雁南歸急落日雲煙北望遙
此際送君無限意蕭疎楊柳玉河橋

曾鶴齡 一首

鶴齡字延年泰和人永樂辛丑賜進士第一歷

官南京翰林院侍講學士有松臞集

羅知州之交趾分韻得北字

惆悵杯酒間躑躅衢路側邇別情所難况君遠行客行
客適何許南交乃絕域山川阻且修匹馬獨登陟丈夫
四海志萬里猶咫尺苦辛諒不辭所思在明德俯視川
從東仰睇星拱北還朝會有期側竚聽消息

薛瑄 二十一首

瑄字德溫河津人永樂辛丑進士除御史歷大
理少卿累進禮部左侍郎兼文淵閣大學士卒
謚文清從祀孔廟有河汾集

蔣仲舒云文清以理
學名其詩則非宋調

詩話文清讀書錄專以宋儒爲師其詩有云吾意六籍外尚多古人書
一朝秦燄烈焚蕩無遺餘掇拾煨燼者補綴誠區區訛闕固已多盡信

寧非愚獨有羣聖心昭哉難翳如多謝宋諸老萬世開迷塗宜於詩亦
宗擊壤矣而集中五言醇雅有陶孟韋柳之風予嘗謂宋之晦菴明之
敬軒其詩皆不隨宋人理趣未見有
礙於講學又何苦而必師擊壤派也

擬古 二首

孤桐生龍門縠絲出東國相合為素琴不離君子側清
彈何悠揚遺音為發越中涵千古心養彼至人德云胡
變新聲哇淫日淪惑舉俗逐時好誰能稱在昔萬事亦
復然不獨琴與瑟

庭竹生涼颺明月從東上候蟲草根鳴夜靜聲愈響逍
遙步階除悠然起遐想三皇五帝時淳朴竟焉往王風
降黍離禮樂委榛莽反覆千載間雜霸迭相長是非垂
不泯勝負在俯仰令人意難平撥置聊自廣

古詩 二首

水火非無功焦溺亦由此君子得其操小人迷所止四
海豈不遙發軔良自邇薰風愜民心黃竹蕩人耳善惡
反手間胡不慎其始

七百卜公旦萬世期咸羸豈不同所願天道有虧盈岐
山麟鳳集函谷虎豹爭趨舍乃如此大運焉得并蓬萊
舟始泛博浪車已驚遂使三秦士不獨驅山坑已矣勿
復言九宇皆炎精

秋日雜詠 二首

庭樹生秋風微涼入衾枕久客得無思遠意復誰論道
腴足充餐天和可當飲以茲撥離憂僻好安所稟大義

自古來旋覆吾已審

翻翻高荷葉秋雨生微涼豈不懷遠道撫時坐空堂何
以為我懽簡策多遺芳古人不可作古道不可忘茲理
將無墜欲語墮渺茫安得忘言子相與傾一觴

荅趙彬

美人生南國豔色世所稀明眸一回顧草木生光輝我
行重嗟惜便欲攜同歸贈以青玉案貢之黃金扉如何
久契闊此念將無違

雜詠

古劍匪新器古瑟匪新音雖無適俗態知己在所尋充
子佩服美感子淡泊心蘊匱固有待無悶良可欽

游習家池

谷口一逕入蒼山四邊開中有習池水水碧無纖埃泉
源初噴薄交流遂滌洄飛鳥鏡中度行雲天外來微風
一蕩拂林影久徘徊寒光空心性俯翫何悠哉愛此不
能去載歌寫中懷

游君山寺

為愛湖中山遂尋山下路取徑彌幽遐涉澗亦回互石
磴足莓苔青林雜煙霧前行如有窮嵐嶺乍分布招提
壓重湖千里周一顧孤峰四無垠形氣自依附山僧復
導我窈窕更徐步疎籬野蔓懸老圃寒泉注逕轉山房
深重與絕境遇白雲檐外生清風竹間度庭花雜無名

明詩紀卷之十
歲晏色猶故澄心得妙觀忘言契良晤愛此林壑清遂
薄塵俗務重來待何時尚子畢嫁娶

渡雙溪

雙溪始合流厓渚遂經復洄潭一鏡平秋影空寒綠野
渡得孤航山家帶喬木適意方自茲前呵戒童僕撫景
重悠然誰能和斯曲

東平行臺有竹翳於惡木荒草命僕芟治嘉植乃
遂詩以紀之

生平苦愛竹義若君子交茲軒忽見之俄頃漆在膠振
衣步其下周覽增鬱陶惡木一何多蔓草一何饒翳此
破苔筍撓彼凌雲梢命僕恣翦伐得辭斤斧勞除惡貴
絕本蘊崇及溝壕荒穢既了了涼風亦蕭蕭修莖遂生
植嘉蔭愜游遨作詩紀顛末庶爲同心謠

穆陵關

危哉穆陵關高出衆山頂地勢愈覺寬天宇相迴迴林
木何蕭森首夏風色冷山樓試一登眺覽恣遐騁沂岱
環西陰淮海接南嶺齊州走北川扶桑控東影道里會
一門山川挈要領緬思千古前豪伯互吞并齊履空復
然秦蠶已侵境干戈被長巒生民困魚鼎於今天道旋
四裔守安靜山行晝悠然水宿夜無警顧我觀風人符
節得屢秉作詩紀茲行傳與山將永

瀘川古意

三蜀古名郡瀘川古名州我來值殘暑偶此數日留新
秋忽改節涼風漸颼颼逍遙散前除仰視天宇周征鳥
去不息白雲亦悠悠佳人渺何許重林蔽層丘秋日復
西邁大江自東流良辰不我與古道曠莫酬願聞瑤華
音行矣旋吾輶

褒斜道中

褒斜一何長深谷自迤邐雲木青無邊羣峰各峻峙鳥
道緣厓顛危棧架江涘冥冥叫子規泱泱響溪水累日
山峽中陟降亦勞只自我入蜀門今逾一年矣既乏督
辦能兼負素餐恥而况鬢髮蒼胡寧不知止上章乞解
綬詔許感不已雖云此谷險且遂北歸喜

過徐州

去年春正月南泛彭城舟今歲值秋暮北上溯長流蹤
跡信往復景物愜觀遊風寒堤柳落波減岸石稠白見
高城堞蒼出遠山丘何處戲馬臺彷彿燕子樓化遷無
停軌事往不可求陳迹竟泯泯虛名但悠悠覽今亦懷
昔發聲遂成謳

苦雨

涼風颭颭雨聲急出門跬步苦沾濕山城拂地雲霧深
河渚交流潢潦溢田夫野婦坐歎息園中有棗不可食
况復離離禾黍垂及時不得收地力一年百事望秋成
秋成奈此淫雨積誰哉爲我誅雲師宛見青天行白日

久雨遣懷

秋來常苦雨風氣早生寒小鳥投林急高鴻下食難奔
流淹古道密霧隱前山試誦停雲句中懷獨未寬

武陵曉泛

今朝風日好來泛武陵溪碧水寒依岸蒼林遠護堤沙
光搖野馬人語散鳧鷖二月桃花發還應處處迷

黔陽山中

景好寧知是異邦竹籬茅舍枕蒼江吏情更有山林趣
綠樹門前画戟雙

竹枝歌

錦官城東多水樓蜀姬酒濃消客愁醉來忘却家山道

勸君莫作錦城遊

于謙 十三首

謙字廷益錢塘人永樂辛丑進士除山西道御
史擢行在兵部右侍郎罷為大理寺少卿景陵
踐阼拜兵部尚書加少保英宗復辟棄市成化

中贈太傅諡肅愍後改諡忠肅有集

陸子淵云于公
有社稷功其詩

亦足冠冕時輩 夏時正云公詩文多至千篇皆填撫餘閒車馬道塗
寄興之作及秉邦政不復經心所見僅一二爾語皆自胷次流出思親
戀闕憂人及物眷眷不忘溢於言表

云少保詩頃刻千言格調不甚高而奕奕俊爽
詩話少保社稷之臣其詩特多秀句如風來疎牖銀燈暗月轉高城玉
漏遲紫塞北連沙漠去黃河西繞郡城流野花偏向愁中發池草多從
夢裏生千里逢人俱是客十年持節未還家鳥飛不過巖頭石人渴難
尋澗底泉風約閒雲難作雨渠分流水不成河炕頭炙炭燒黃鼠馬上
彎弓射白狼天外青山圍故國雨中黃葉下空潭皆意態自然不煩雕
琢其論詩曰詩豈易言哉發於心形於歌詠盡乎人情物變非深於理

而適於趣則未易工也
觀其持論造詣深矣

自歎

我生四十餘已作十年客百歲能幾何少壯難再得今
朝太行南明日太行北風雪敝貂裘塵沙暗金勒寒暑
互侵凌凋我好顏色齒牙漸搖脫鬢髮日以白位重才
不克况此遲暮迫早賦歸去來庶免清議責

暑月將自太行巡汴

三晉衝寒到中州冒暑回山川元不改節候自相催綠
樹連天暗丹葵向日開太行雲縹緲搔首意徘徊

游春

滿路香塵起尋春思欲迷樹晴鶯出谷溪暖燕銜泥玉
勒嘶芳草青樓瞰大堤風光無限好都在画橋西

春日大風感懷

遠塞足風沙春深不見花層冰猶度馬弱柳未藏鴉易
醉愁邊酒頻歸夢裏家凭闌一搔首心緒亂如麻

除夕夜坐感懷

秉燭焚香坐不眠夜長難到五更天懷人此際隔千里
為客明朝是十年遠道風霜今老矣故園梅柳想依然
椒盤獻歲知誰共獨把深杯對影傳

秋風

蕭蕭入夜動清商披拂園林草木黃快意埽除天下熱
何人吹送枕邊涼荻花楓葉愁江渚蓴菜鱸魚憶故鄉

萬里碧天雲散盡衝開征鴈不成行

偶題

倦鳥投林處斜陽在樹枝薄雲收未盡山雨乍晴時

春夜

長風送華月照我庭前樹宿鳥忽驚飛雙雙背人去

平陽道中

楊柳陰濃水鳥啼豆花初放麥苗齊相逢盡道今年好
四月平陽米價低

上太行

西風落日草斑斑雲薄秋容鳥獨還兩鬢霜華千里客
馬蹄又上太行山

夏日憶西湖風景

湧金門外柳如煙西子湖頭水拍天玉腕羅裙雙蕩槳
鴛鴦飛近采蓮船

暮春客塗即景

雨中紅綻桃千樹風外青搖柳萬條借問春光誰管領
一雙蝴蝶過溪橋

擬吳儂曲

憶郎直憶到如今誰料恩深戀亦深刻木為雞啼不得
元來有口却無心

劉球一首

球字求樂更字廷振安福人永樂辛丑進士授

禮部主事改翰林侍講以忤王振矯旨下獄死

景泰初贈翰林學士謚忠愍有兩溪集李時遠云忠愍金春

玉映如月瓊天
犀人共寶之

山居

水抱孤村遠山通一徑斜不知深樹裏還住幾人家

陳叔剛 一首

叔剛名棖以字行閩縣人永樂辛丑進士官翰

林修撰遷侍讀有絢齊集錢原博云侍讀詩沖和
瞻麗諸體各極其妙

松坂

亭亭萬松林別構僅容膝席陰無冬春簾翠自朝夕主人愛松風靜聽意自適清吟到夜分明月在中舄是非

曠不聞煙霞已成癖我有小山謠期君謝閒逸黃鶴遊青冥汗漫不可即

萬節 一首

節字資中安福人永樂辛丑進士除知榮昌縣入為御史遷廣西按察副使有雪坡集

漁村夕照

獨槩村西漁艇重門樹底人家夕照平蕪遠近小橋流水橫斜

張楷 三首

楷字式之慈谿人永樂甲辰進士授江西道御史出為陝西僉事轉副使擢都察院右僉都御

史有和唐集

徐子元云式之和唐所謂服堯之服惜其自作殊不疾意 蔣仲舒云中丞遍和唐詩可謂捧心效

顰究其才致亦一時之彥也

國初詩家遙和唐人起於閩

人林鴻高棟永天以後浸以成風式之遍和唐音及李杜詩各十餘卷

又有并和瀛奎三體諸編者塵容俗狀填塞簡牘捧心學

步祇供歲嘔昔人有言賦名六合已是大愚其此之謂乎

詩話中丞和唐不獨律詩踵韻而已至歌行古風并上句亦和之同時

餘姚陳贄維誠亦然登黃鶴者必賡崔顥之章宴滕王者必仿子安之

體人雖至愚不愚於此矣其在閩提督軍務除夕作詩云亂離何處覓

屠蘇濁酒三杯也勝無又云除夜不須燒爆竹四山烽火照人紅為言

者所劾而罷此殆非和韻詩宜

其中禍後舍和韻不復作也

漢宮曲

日暮上簾鉤春花壓翠樓忽聞宣召急羅帕掩篋篋

江南曲

忽得三巴信郎歸未有期只言風浪險不是薄情兒

江南春

滿川啼鳥怨殘紅水郭春園柳絮風春雨一番江水闊
草痕將綠到吳中

明詩綜卷十八下

明詩綜卷十九

小長蘆 朱彝尊 錄

白洋 朱士諤 緝評

瞿 佑 十二首

佑字宗吉錢唐人洪武中以薦歷仁和臨安宜陽訓導升周府右長史永樂間謫戍保安洪熙

乙巳赦還有存齋樂全集香臺百詠 宗吉 風情麗逸樂府

歌詞多俚紅倚翠之語為時傳誦

靜志居詩話明初詩家以楊廉夫為祭酒廉夫見同調綴以評語不曰牛鬼則曰狐精此王常宗論文即以狐比廉夫也宗吉幼為廉夫所賞拾其唾餘演為流派劉士亨馬浩瀾輩爭效之譬諸画仕女者肌體癡肥形神猥俗曾牛鬼狐精之不若矣其稍有風骨者如射虎何年隨李廣聞雞中夜舞劉琨蹈海莫追天下士折腰難事里中兒庶與凌彥紳李宗表相近當時嘗取宋元金三朝律詩一千二百首編為鼓吹續音

惜乎不
得見矣

天魔舞

承平日久寰宇泰選伎徵歌皆絕代教坊不進胡入聲旋
女內廷自試天魔隊天魔隊子呈新番似佛非佛蠻非
蠻司徒初傳祕密法世外有樂超人間真珠瓔珞黃金
縷十六妖娥出禁籞滿圍香玉逞腰肢一派歌雲隨掌
股飄飄初似雪迴風宛轉還同鴈遵渚桂香滿殿步月
妃花雨飛空降天女瑤池日出會蟠桃普陀烟消現鸚
鵡新聲不與塵俗同絕技頗動君王覩重瞳一笑天回
春賜錦捐金傾內府中書右相內臺丞袖無諫章有曲
譜天魔舞筵宴開駝峯馬乳黃羊胎水晶之盤素鱗出
玳瑁之席天鵝擡彈胡琴哈哈迥吹胡笳阿牢來羣臣
競獻葡萄杯山呼萬歲聲如雷天魔舞不知危高麗女
六宮如西番僧萬乘師回紇種類皆台司漢兒回避南
人疑天魔舞樂極悲察罕死字羅歸鐵騎驟金刀揮九
重城闕烟塵飛一榻之外無可依天魔舞將奈何多藏
金叵羅急駕白雲駝陰山之北避兵戈

春社詞

十日一風五日雨社前拜祝神已許瓦盆潑灑斟濁醪
高俎縱橫薦肥羜鳴鳴笛聲坎坎鼓俚曲山歌互吞吐
老巫狡獪神有靈傳得神言為神舞祭餘分肉巫自與
醉裏狂言相爾汝小兒覓餅大兒扶頭上神花付鄰女

高門歎

高門成高門壞不及十年見成敗獸鏤移去屬何人重
構高門臨要津門前牢栽楊柳樹莫被他人又移去

義士行

鍊金鑄范蠡買絲繡平原逝者恐無知徒用勞心魂陋
矣哉烏江八千軍壯矣哉海島五百人任安念舊不改
轍豫讓報讎須殺身酒不必澆劉伶墳上土劍不必挂
徐君墓前樹感君恩重死相從冥漠重泉有逢處

看燈詞

六首

東家砍竹縛山棚西舍邀人合鳳笙官府榜文初出了
今宵喜得晚來晴

銷金小繖揭高標紅藕青梅滿擔挑依舊承平風景在
街頭吹徹賣錫簫

傀儡裝成出教坊綵旗前引兩三行郭郎鮑老休相笑
畢竟何人舞袖長

風簾珠翠動紛紛笑語聲喧隔戶聞明月滿街天似水
不知何處著行雲

文錦坊西後市南鬧竿挑過百花籃少年游子誇輕俊
拾得雙頭碧玉簪

村裏兒童暫入城隨羣齊上大街行歸來徹夜渾忘睡
從此春田嬾去耕

清明

兼旬蹭蹬在京華又見東風御柳斜客裏不甘佳節過
借人亭館看梨花

過蘇州

白蓮橋下暫停舟垂柳陰陰拂水流舞榭歌樓俱寂寞
滿天梅雨過蘇州

偶桓九首

桓字武孟太倉衛人洪武中應秀才舉為崇安
從事授桂林河泊大使終荆門州吏目有江雨

軒集

王元美云吏目頗協
風格故多鴻爽之詞

詩話明初詩家操選政者賴良直卿許中麗仲孚劉仔肩汝弼沈巽士
稱王偁孟敷皆有所蔽惟瞎牛乾坤清氣一編能開生面惜予所鈔闕
七言近體絕句未
得全書恒以為憾

雜詩二首

衡茅日岑寂嘉樹生繁陰夙興挹朝爽翛然澄我心如
彼倦飛鳥冀得棲故林抱經味遺言且復理鳴琴惜哉
鍾子沒曠世誰知音

養疴卧丘樊庶得脫塵鞅三徑日就荒行樂倦還往荆
榛既蕃蕪荼蓼亦滋長幽蘭獨憔悴况復纏草莽不因
馨香發豈獲君子賞

早發灘江示同舟戴伯貞

夜泊南熏亭曉上白石潭北風颯以爽蕭蕭動征衫灘
水激沙礫桂嶺浮烟嵐顧此道里修遙遙在天南常恐
瘴癘惡三年情不堪今晨始得歸灑然脫塵凡况遇同

袍友高歌酒初酣搔彼頭上雪短髮各鬢髮相顧但一
歎往事悉已諳林泉在何處為我洗餘慚

夜渡郎官湖

夜渡郎官湖波影忽動蕩搖搖泛孤舟軋軋打雙槳天
闌星自流山黑月未上何處虎牙關令人起遐想

赴夷陵

迢迢上夷陵意促日易暝亂石斲馬蹄叢棘冒衣領登
山若攀天度壑如赴井撫膺欲嘔心喘息屢延頸但逢
過虎跡負絕行人影顧茲客懷惡况乃道里永毫素難
具陳聊以述短詠

秦文仲授溧陽教諭賦此贈別

淮海秦徵士鬢鬢雪滿顛五年三拜詔十日九朝天
許償詩債誰能與酒錢冷官歸更好不負舊青氊

送陳民初歸廣州兼問訊趙知事公傑

靜江遙帶五羊城官舸乘風畫鷁輕客館鄉人秋送別
高齋弟子日相迎枕椰接葉蠻烟暗螺蚌含珠海月明
到郡為詢賢贊府幾時鞍馬定朝京

趙王孫墨羊圖

王孫長憶使烏桓因念蘇卿牧雪寒落盡節旄無復見
寫生傳得兩羝看

王孟端墨竹

鳳池退食寫琅玕醉墨淋漓尚未乾寄贈故人良有意

清風日日報平安

謝 縉 五首

縉字孔昭吳人有蘭庭集

張繼孟云孔昭詩憤戚而不傷和悅而不流可謂得性情之正

詩話孔昭画入能品子嘗見其山水真蹟華亭董尚書稱為勝國名流然其詩集刊於永樂中汝南周傳浚儀張肯序之卷未有送盛啓東還吳詩并寫雲陽早行圖以贈題云永樂丁酉十月徐用理選其詩入湖海耆英集不得謂之元人矣

修竹塢訪蕭隱士

草堂寂寞西澗坳隔林犬吠聲寥寥幽人無事不出戶
送客有時還過橋溪上斜陽立將盡莎間細路歸仍遙
明朝秋風桂花發卧穩東山誰見招

春思

簾幕風微篆有香起來時候已斜陽梨花雲冷不成夢

蛺蝶一雙飛過牆

寄王廷桂

山連罨画雲烟好路入苕溪水木清如此江南好風景
故人何事不歸耕

寒食村中

流水涓涓映淺沙石林風急亂啼鴉荒村寒食無人到
何處香來枳殼花

漫興

村村昏黑樹陰濃只尺湖塘路不通夜半風來雨吹散
權歌依舊月明中

趙 迪 四首

迪字景哲懷安人自號白湖小隱有鳴秋集

顧

言云景哲與洽情真固是逸才

俞憲百家詩以迪為山人

徐庸湖海耆英集載迪元夕應制詩徐泰皇明風雅云宜陽人官吏部

侍郎未詳孰是然

景哲非山人明矣

詩話景哲五古學唐人而得其丰韻二玄遠遜之不知當日何以不列

十子之目

據二徐氏辯景哲非山人其實不然福州林孝廉估獲

徐興公所藏鈔本鳴秋集有景泰五年迪仲子壯後序中云先人值時

多故投老林泉而同時閩人鄭閣公望鄭關公啓郭履敬夫均有輓鳴

秋山人詩則宜陽人官吏部侍郎賦元夕應制詩者自是別一

人矣壯懷安人中宣德十年鄉試官南海知縣具載閩省賢書

題浦舍人梧竹圖

吾懷出塵想飛思凌滄洲湘江夜來雨寒色川上浮涼
飄金井夕露滴銀塘秋故人隔千里對此空離憂

幽人獨憩圖

幽人遺世氛心與浮雲薄薜蘿寒可衣山泉時自濯白

雲林下來黃葉衣上落高風不可攀逍遙在林壑

山水圖

蘇耽昔隱處落日惟孤雲青山丹竈前橘井香氤氳湖
光林際斷嵐氣霞外分仙源不可即清思徒紛紛

周青士云頗近

常建

殘雨

黃陵日已昏蕭颯涼颼起殘雨挂空江冥濛若千里

郭履 二首

履字敬夫福州人有鏡湖清唱

徐興公云敬夫吾鄉隱君子百年來罕有知者

其題青鋪嶺絕句云家林想在空濛外一帶螺江隱翠微又有門前湖

白與山青分攜空過白湖亭之句其所居當在白湖螺浦之間與趙景

明言紀卷十九
七
懷鳴秋先生之京

澄江晚悠悠離思杳難極西風鴻鴈飛我憶鳴秋客遠
樹帶餘暉前川起寒色即此待歸舟沙頭埽苔石

送友之京

我正愁寥落君今又北遷春歸萬里外人去五雲邊塞
柳迎征旆江花照別筵離情不可道去住各悽然

鄧林一首

林初名觀善字士齊新會人洪武丙子以明經
中鄉舉官南昌教授擢吏部驗封主事文皇改
名林後坐法戍保安遇赦晚居杭州有湖山游
詠錄退菴集

二月九日大駕北巡賦詩紀事

虎衛三千士龍旂十二辰兩京嚴古制六載重時巡宿
雨開新霽青陽屆仲春鍾山浮王氣輦路動香塵河岳
提封舊車書制度新覃恩深似海過化速如神壽域熙
民物貞符叶鳳麟太平無以報願效華封人

平顯二首

顯字仲微錢唐人以薦授廣西藤縣知縣謫戍

雲南沐黔國延為西席

張宗海云仲微沂長江徑洞庭道
夜郎謫昆明其為歌詩怪變豪放
得於遠遊之助

題丁野夫画

野夫已沒四十載化鶴歸來知是非郭外梅村更地主

日言終卷十九
六
筆端松石見天機一時好手不可遇千古賞音如此稀
長憶西湖舊遊處画船秋雨白鷗飛

光霽堂

碧雞翠鴻濛夕影到滇水月出金馬東徘徊白雲裏

施敬 十一首

敬字孟莊錢唐人謫居滇

詩話孟莊詩頗清越句如斜日黃留漁浦樹隔江青度海門山鷓鴣蹋
翻黃竹葉翡翠啄破蒼苔花天吳拔斷蛟龍尾月露洗出珊瑚枝夕陽
靄靄衆山暝秋水迢迢雙鷺明茅茨綠深江路草枇杷
黃盡客窗枝均有風致若歸燕一首疑是感革除而作

送吳文學東還

結歡未云久詎盡平生語執手臨路隅離觴聊一舉殘
鐘草堂夕落雁蘆洲雨相憶渺天涯深惊若爲處

題梅德芳杏林圖

梅仙煉丹處山杏栽無數賣藥到人間衣裳帶紅霧花
開不知歲子落還成樹我欲與之言飄然騎虎去

送人還廣陵

會面情方洽睽違意更長天涯同是客秋杪各還鄉黃
葉飛揚子青山繞夜郎分襟即萬里相顧兩茫茫

歸燕

已知秋社近更繞画梁飛主意豈不念天時難獨違雙
歸遼海遠對語夕陽晞花雨重來日故巢還是非

送譚孟端

靡蕪葉齊春水生故人欲歸傷吾情草堂酒盡落花滿

山驛馬嘶殘月明醉中執手不忍別路上逢人須寄聲
明朝相望隔關塞惟見白雲天際橫

巴陽夜泊

獨權三巴夜秋高片月孤灘聲將客夢萬里下東吳

貧樂軒

長卷束牛腰簞瓢繫牛角讀書深樹中不知山日落

塞上曲

八月秋高塞草斑將軍千騎獵前山彎弓不射南飛雁
恐有征人附信還

南行途中寄錢唐親友

萬里移家入瘴烟故鄉音耗若為傳衡陽自古無來雁
况去衡陽又八千

漕溪夜泊

空山孤驛鼓逢逢明月流輝滿大江水鳥夜寒棲不穩
一雙飛影過篷牕

讀程原道昆陽詩悵然有懷

昆陽市上美人家飲酒曾停過客車萬里相思不相見
東風吹盡蜜檀花

劉叔讓一首

叔讓揚州人

詩話叔讓題正南門城樓云紅樹一村蒲旬晚黃雲滿地楚田秋
夜述懷云南詔羈桂傷短鬢東湖寥落憶扁舟蓋亦明初徙滇者

憶弟

漂泊嗟吾老，羈遲見汝難。
西風鴻雁急，落日鶴鴿寒。
渭北書長絕，滇南淚不乾。
相思朝夕夢，懷抱幾時寬。

陸顥 一首

顥字伯瞻，揚州興化人。洪武中舉明經，官戶部員外郎。永樂初，與修太祖實錄，奉使朝鮮。有頤光集。

吳江道中

鱸肥蓴脆正秋風，綠水紅橋宛轉通。
不獨季鷹思故里，扁舟吾亦戀吳中。

李孝謙 七首

孝謙名本，以字行。鄞人，與弟悌謙、洪永間相繼。

舉孝廉，皆以母老固辭。有中林集。

詩話：孝謙、悌謙、忠謙兄弟三人，皆有至行。其父仕開饒於貲時，會稽胡舜咨、金華戴叔能、錢唐楊彥常、曹南吳主一、豫章揭伯防先後游四明，什開招致賓館，俾諸子問業，故其詩文有法。孝謙撰長律，英華度有可觀，惜其不傳。

題畫

青天際，遠水落日明。
遙岑奮袖拂蒼石，憩此長松陰涼。
颺灑露頂正可絃，吾琴古調詎自秘。
坐惜無知音，美人隔秋水。
望望烟波深，何當一相晤。
曠焉諧素心。

題柴昆陵越山春曉圖

君莫著謝公登山屐，更莫問子猷泛雪舟。
請君試看高堂壁，彷彿李白天姥夢中遊。
於越山川甲天下，秦關蜀道皆土苴。
柴侯晚年天機精，酒酣潑墨為子寫。
天姥高

出東南天天台四明相蟬聯影落平湖一鑑淨正對賀
老山莊前近山青青遠山小烟霧冥濛漲春曉雲門日
出似聞鐘耶溪樹綠應啼鳥鳥啼不可聞林深不見雲
只疑空青四山合倏訝飛瀑雙崖奔極知妙手奪天造
真宰上訴天應笑獨脚山魃作鬼精偷向靈巖拾奇草
水竹江花何處灘漁郎翠蓑露未乾青帘酒家石橋右
樣舟却憶姚江干長松之下一片石竹杖芒屨二三客
脫巾高挂白雲邊醉倚青天翠如滴

送徐允迪還城中

寒梅照虛牖嚴霜凋弊裘故人動歸興歲晏不可留徐
卿立身何坦蕩行年五十猶偃仰不思唾手取公卿却
甘低頭在草莽市中賣藥能逃名杖頭挑錢還解醒悲
來不作窮途哭時復有詩鳴不平忘年之交古來有臭
味相同即爲偶來遲去疾奈爾何無限離情付杯酒北
風吹雨凝作花船頭敲冰船尾划道傍行人指歸路城
上棲烏還到家城市塵埃易更改還念山林青眼在看
花有約明年來教我村童埽門待

送巽上人還台州

挂錫遙憐野寺鐘赤城何處問芙蓉歸心千里月千里
行色一重山一重霞洞春深多藥味石橋雲斷少人蹤
秋風紅葉桃花似此日相期谷口逢

新秋寄德鄰

一雨兼旬水沒塍江村涼思陡然增鴻來燕去非迎送
扇故衣新豈愛憎遠戍有書終可到小樓無賦且須登
不知明日還晴不船過湖南聽采菱

寄題黃巖張氏隱居

天台佳氣鬱龍蔥中有留侯慕赤松繞屋溪聲長落水
對門雲氣悉成峰果林秋熟獲將子藥圃春肥鹿長茸
幽討莫辭行路遠穿雲已辦一枝筇

題画

溪頭春水碧粼粼溪上春山絕點塵不信白雲都占盡
也應茆屋有閒人

李悌謙

三首

悌謙名未詳亦以字行

擬古

驅車前送君送君長亭道落日照道周君行何草草結
交既已晚相去一何早世路多險巇君身詎能保別時
春草深於今已枯豪思君衣帶寬憶君容顏老

春社

今日報春社風光處處同社公三日雨花信幾番風野
老還祈穀村醪可治聾醉歸茅屋卧花月淡朦朧

八月廿夕起東軒步月

今夕何夕耿無眠攬衣起聽更漏傳中秋能隔幾夜遠
明月已減三分圓雲開數雁影帖地露冷獨鶴聲徹天

心情未覺坐來倦
燒燈更讀離騷篇

尤安禮 一首

安禮字文度吳縣人建文元年舉於鄉官至貴州布政司參議

詩話少參為高士敏方希直所取士樹屏歸田人罕見其面况太守鍾入觀楊東里詢其起居鍾無以應東里曰公為守土吏乃不識尤文度耶鍾歸訪之見一老絡絲巷中布衣紉屨環堵蕭然鍾欲割官地益宅謝不可遺以金亦不受鄉人至今傳為美譚其遺文尚存韻語特少送人從軍一篇雖乏警句然唐名家作古詩亦有如是而止者

送人從軍

秋風正搖落游子遽離羣
結髮事戎行遠戍驃姚軍
悠悠歲月邁渺渺川涂分
何以慰心曲努力樹功勳

錢安 二首

安字靜能後以字行鄞縣人臨安訓導遷韓府

紀善永樂改元聞其名召至京固以老辭放還

有畦東集

李杲堂云紀善詩健樸有蒼然之色

舟中遣懷

朝發浙江頭暮宿越城下
寒月照船窗清霜肅原野
豈不念別離吾道有用舍
俛仰宇宙間孤懷浩難寫
強取囊中琴起彈仍復罷
悠悠世上人誰是知心者

喜晴

秋風忽起卷重陰
日色微茫照樹林
野老扶藜看白石
山人伐木度青岑
門前溪水深三尺
牆外竹梢高十尋
明日甕頭新酒熟
且依松下一開襟

鮑仁濟

二首

仁濟字原弘黃巖人永樂初伊府紀善有怨菴集

絕句

月移階上花露滴階下樹四顧寂無人流螢自來去

燈下有述

白頭紀善病艱難一點青燈坐夜闌千里恐驚親骨肉
緘書猶自報平安

林枝

一首

枝字昌達閩縣人號古平山人有效顰集

詩話聞自十才子外能詩而不與其列者有趙迪景哲林紹淳裕鄭文霖汝眾林敏漢孟陳本叔固及昌達也昌達集不傳徐興公家有老儒

手錄明初詩今歸林孝廉信子借觀錄之

寄彭韞玉

空齋牢落思寥寥荏苒年光逝水消憶得當時分袂處
柳花如雪過江橋

劉績 七首

績字孟熙紹興山陰人隱居不仕人稱西江先

生有嵩陽集

顧玄言云孟熙會稽名家屬興豪華才思雄健

詩話殘雪未消雙鳳闕新春先入五侯家晚唐張蠙詩也孟熙易殘以霽易新春以春風攘為已作遂以此得名人或少之然竹影橫斜水清淺桂香浮動月黃昏非江為詩乎林君復易疎暗二字竟成千古名句所云一字之師與活剝生吞者有別也張作全詩不稱不若劉之首尾相當其自題詩本云幼小工刺繡極知鍼綫難祇綠花樣古不耐俗人看是時人爭學温李宜其以拔俗為嫌耳

題西陵送別圖送姚進士

悠悠復悠悠風吹江上舟今朝天色好送客西陵頭西
陵在何許冪歷春郊樹搔首望行人迢迢上京路京路
一千程官梅照眼明春風濃似酒難浣別離情別離餘
幾日佇得君消息折取杏園花慰我長相憶相憶夢相
仍高樓只自登春潮知我意日夜向西陵

送周明德應詔之京師

閭門柳條未堪折只宜相見不相別人生蹤跡各東西
半是車輪與馬蹄把酒送君城北路曉日鴉啼烏柏樹
一聲歌罷淚沾巾僮僕催人上塘去願為轆轤纏青絲
轆轤可轉心不移男兒出處自有分與君那得不相離
官家有程行莫緩後夜相思月還滿

送友人歸番陽

芳草綠尚淺故園春未殘平生為客慣今日別君難短
檣吳歎曲哀絲楚女彈江花正滿眼且莫下長干

送王內敬重戍遼海

別淚不可忍杯行到手空風塵重作客寒暑易成翁曙
色連關樹秋聲起塞鴻天涯見親友還與故園同

早春寄京師白虛室先生

帝城佳氣接烟霞草色芊芊紫陌斜霽色未消雙鳳闕
春風先入五侯家歌鍾暗度新豐樹游騎晴驕上苑花
獨有揚雄才思逸應傳麗句滿京華

結客行

結客千金盡酬恩一劍存羞為狗盜伍不傷孟嘗門
月夜獨坐憶錢唐暹師房聽施彥昭摘阮
忽思吳客四條絃出谷新鶯咽洞泉一曲醉翁何處聽
冬青樹底佛堂前

鄭嘉一首

嘉字原亨紹興山陰人時稱柿莊先生

秋日懷孟熙

故人丘壑隱塵路往來遲寒暑空相憶雲山不可期古
碑梅福寺荒井石郎祠舊日同游處偏勞入夢思

趙宗文二首

宗文名文以字行長洲人官鄱陽知縣有慎獨

齋集

詩話趙叟傳詩不多率清穩可誦其題金山寺云淮海西
來三百里大江中湧一孤峰凌厲無前惜乎全詩不稱

送姜公寔還汝陽同知是日飲餞至曉始別

酒醒江館夜燈微故舊殷勤不忍違孤櫂近從滄海發
一官獨向汝陽歸雲開遠浦青山曉霜落空江野樹稀
明日相思成兩地西風愁見塞鴻飛

清明道中書懷

東風道上亂開花游子偏驚見物華寒食已過嗟在客
春衣將換憶還家山城樹暗人逾靜野店鶯啼日未斜
空約同游與諸弟今朝猶自各天涯

陳靖遠一首

靖遠南昌人

姑惡行

芳池月陰春草碧有鳥有鳥鳴不息千聲萬聲道姑惡
新婦低回淚痕落姑惡姑惡姑不惡努力牕前勤織作
嗟爾小鳥胡不思新婦會有作姑時

錢

遜一首

遜字謙伯紹興山陰人洪武末以薦授寧夏提
舉水利吏目永樂初遷知孟津縣改弋陽坐累
戍交趾復官文昌主簿有謙齋集

春詞

紅杏蕭牆翠柳遮重門深鎖屬誰家日長亭館人初散

風細鞦韆影半斜滿地綠陰飛燕子一簾晴雪捲楊花
玉樓有客猶中酒笑撥沉烟索煮茶

何

澄一首

澄字彥澤江陰人建文元年舉人永樂初歷官
袁州知府

題画鴈

蘆花瑟瑟水茫茫落月沉沙夜未央離思不禁天外鴈
孤舟燈火客三湘

吳

鎮一首

鎮字稽陽吳江人

重過沙河有感

白鶴沙頭水自波扁舟曾載夕陽過東風一路蘼蕪綠
添得春愁別後多

陳觀一首

觀字思賢南海人

詩話明洪永間有四陳觀一不知何許人中洪武辛未進士一中洪武
丁丑進士福建永福人一中洪武庚午舉人字子瀾富陽人一南海人
字思賢子瀾初筮為延平教授調黃州升國子助教力請補外改武昌
教授再調荊州初克應天同考試官再為江西福建考官調荊州後又
為江西福建考官致仕後復起為應天同考試官掄文六次居教職五
十餘年洵異事也陳少保循志其墓稱誨諸生之暇輒為詩文以應四
方之求及引年歸日與故舊賦詠為樂惜其詩傳者罕矣
九日登高一律南皮李時遠云是南海陳觀之作今從之

九日陪李上猶登高

百年能幾遇重陽逐伴登高引興長邑宰喜陪元亮飲
參軍那似孟嘉狂山雲映水搖秋色浦樹含風送晚涼

滿路黃花應笑我白頭猶自客他鄉

董儒一首

儒字大賓鄱陽人

四明夜泊

孤城臨野戍短檝倚江橋客路辭家久親闈入望遙斷
雲晴後樹明月夜深潮感此無窮恨令人倍寂寥

吳子恒一首

子恒豐城人寧海縣丞有雪厓詩集

詩話子恒詩一卷其曾孫巡撫雲南都御史祺刊行秀水陶照華容孫
繼芳臨海趙淵零陵楊材皆為之序有弟叔潤中永樂丙戌進士仕至
浙江按察僉事及卒子恒哭以詩云出仕應同歲歸休又共年又云介
壽周花甲為官歷四朝則其卒在正統間也又有八句自述詩云天與
遐齡八十秋六旬老矣得歸休蓋歸田廿載後乃沒攷之南昌台州二
府志皆不載其人詩雖欠工趙淵稱其不出位不狎物若老人整巾體

貌自別因
存其一絕

高洲

青山西峙水流東
陽谷縈紆一道通
老去相知一藜杖
天邊扶我最高峰

錢復亨 二首

復亨松江華亭人
蕭山儒學教諭有講餘集

仲魏

房云復亨詩清而不枯華而不豔

蘇臺懷古

闔閭城柳幾春風
山遠臺高望眼空
麋鹿不來人亦去
鷓鴣啼處是吳宮

題画

嫋嫋涼風斷復連
青山深處藕花邊
誰家樓外停歌舞
又上西湖十錦船

詩話西湖船製不一以色名者有明玉鎗金金勝寶勝大綠間綠游紅申屠仲權詩紅船撐入柳陰去釋道原詩水口紅船是妾家是也形名者有龍頭白樂天詩小航船亦画龍頭是也有鹿頭楊廉夫詩鹿頭湖船唱報郎是也形色雜者有百花十樣錦錢復亨詩又上西湖十錦船是也以姓名者有黃船董船劉船見吳自牧夢梁錄蓋大者謂之頭船最大者賈秋壑所造車船也車船棚上無人撐駕但用車輪脚踏而行其速如飛小者謂之瓜皮船廉夫詩小小渡船如缺瓜歐陽彥珍詩瓜皮船子送琵琶張大本詩瓜皮小船歌竹枝周正道詩瓜皮船小水中央是也又有總宜船取東坡居士淡妝濃抹總相宜之句名焉李宗表詩總宜船中載酒波凌彥翀詩幾度湧金門外望居民猶認總宜船是也四水潛夫述武林舊事值探春競渡日画橈櫂比如魚鱗無行舟之路楊謹思詩大船搥鼓銀酒缸小船吹笛紅繡窓今則敗舫數艘無復徵歌按舞者矣

蔡庸 一首

庸字惟中紹興山陰人

徐氏席上聞歌有感

休遣雙鬟唱竹枝聽來渾不是當時自從夢隔巫山雨
贏得秋風宋玉悲

詩話惟中與錙子孟熙唐愚士毛鼎臣齊名時號唐錙毛蔡席上聞歌一絕宛然劉夢得杜牧之遺音

鄭關四首

關字公啓閩縣人有石室遺音部齋集

暇日南湖莊上

門逕絕車塵惟聞沙鳥語誰識忘機人山間坐朝暮南
風吹雨來颯爽溪頭樹白鷗知我閒相看不飛去

題秋江送別圖

美酒雙玉壺沙頭送行客瑟瑟荻花風寒江秋水白落

日下長空返景明石壁去去入烟霞相思楚天隔

輓任本立

陸沉誰分聖明朝老向窮途怨未消荒冢已無行客弔
歸魂徒有故人招臨風短笛腸空斷落月空梁夢漸遙
從此不須頻北望嶺猿江樹日蕭蕭

竹枝詞

十二灘頭水接天千山陰雨萬山烟自從前路風波惡
不敢回頭望別船

朱琳一首

琳字玉林號雨椿嘉興人

雨中過韶州

船下韶龍日欲晡四山雲起漸模糊沙鷗衝浪頻來往
汀樹迷烟半有無作客又驚三月暮思家其奈一身孤
愁懷結轆渾如醉獨倚篷牕聽鷓鴣

曾一本一首

一本南昌人

挽屠指揮

一別驚淪沒空遺大樹陰愁枯雙淚眼交絕百年心瘴
海連天闊黃茅過嶺深料應魂未返悵望獨長吟

李進 三首

進字孟昭嘉興人永樂初聘為府學訓導有西

園先生集

高念祖云吾鄉少傅俞公山為孟昭弟子西園先生集五卷少傅子誥所刊也以校官兩應省闈之聘其在闈

則永樂庚子也其在山東則癸卯也海鹽李孟璿志墓稱其居喪哭母
眇一目而廬陵陳方序其集稱其詩清麗工緻變態不一錢唐姜蓉塘
亦極稱之

詩話孟昭鐵松居士懷用和士林詩選取以歷卷句如杏花村裏青旗
酒楊柳隄邊画鷁船三月東風初去鴈一番新雨又飛花菰蒲風外呼
漁艇楊柳陰中認酒樓均有晚唐人風致

花游曲

飛花入簾宮漏長游絲落絮春茫茫金鞍駿馬青絲勒
綺閣小姬紅粉妝黃金作丸落花底啼鳥隔花飛不起
明朝更欲載東風早買湖船放春水

同陳劉二掌教游湖作

湖光瀲灩鳥間關小櫂夷猶意獨閒春正好時初過雨
望中佳處惜無山花明遠岸青旗出柳拂微風画舫還

四美由來俱不易人生莫遣鬢毛斑

西湖夜泊

蹇驢衝雪岸烏紗夜醉西湖賣酒家十六吳姬吹鳳管

卷簾燒燭看梅花

姜明叔云
蘊藉風流

謝 矩 一首

矩字元規鄞人有鳴窮集

賦望郎回山

望郎回望郎不回心欲摧化作山頭一拳石質堅不朽
心不灰花開花落秋復春煢然獨立誰與鄰夜深惟見
皎皎月雨晴只有英英雲將心誓比雲與月雲有卷舒
月圓缺百年夫婦終古心豈辨新離與故別此心炯炯

天地知山高水深終相期郎君應有歸來時

姚 黼 一首

黼字廷章嘉興人處士有可閒集

寄景伊文學

憶昨逢君四月初笑談懷抱最相符朝乘白下看花騎
暮醉長安賣酒壚別去江山頻悵望歸來松菊未荒蕪
登臨日候南飛鴈肯寄平安一紙無

張 璨 二首

璨字蘊之嵯縣人

詩話蘊之取材
選體古意猶存

君子有所思行

日言終卷十九
五
騁駕向名都縱觀極西京煌煌九衢裏列第起朱甍虹
梁架層漢翬閣度紫清高槐蔭金溝弱柳垂雕楹前揚
許史鑣後曳金張旌燕姬撫瑤瑟趙女彈鳴箏歡娛豈
終極為樂擬千齡清川去悠悠日光易傾金谷歎綠
珠上蔡悲蒼鷹鯨華會當歇大運有虧盈勿嗤黔婁室
寂寞掩柴荆

婕妤春怨

太液柳垂絲昭陽花滿枝如何長信草獨是得春遲

項 一 首

伍字如僉温州瑞安人

秋江送別為戴友諒賦

蕭蕭落葉早寒天忽送秋聲到耳邊千里客心驚歲月
五湖鄉夢入風煙青山紅樹還家路綠水滄洲載酒船
夜半燈前對兒女白頭重話謫居年

明詩綜卷十九上

明詩綜卷十九下

小長蘆 朱彝尊 錄

震澤 席前席 緝評

廖 駒 一首

駒 閩人有強恕齋橐

思親

戎馬何時歇奔馳倦此身青燈孤館客白髮倚門人書
信連年絕家山入夢頻歸來未有日回首一沾巾

李孟璿 一首

孟璿名均海鹽人以薦官府學訓導有南莊集

靜志居詩話海鹽半邏劉長卿詩所云半邏鶯滿樹也近市有呂冢土人相傳是吳孱陵侯蒙所葬攷之吳志荊州記蒙卒於公安葬於蒲圻則

非蒙家明矣按漢季黃中之亂吳有許昇妻呂榮不辱於賊為所殺糜
府君歛錢葬之嘉興南地名義婦堰然則家為榮之家也南莊西溪兄
弟實居於是予少日欲編緝樵李先民詩李布衣麟友為二李族孫錄
其宗譜所載南莊西溪詩各數十又有李景孟詩一卷今已亡之僅就
英華集中兄弟各錄一首景孟中景泰
甲戌進士求其詩不復可得附識於此

擬古

卞氏有美璞采之荆山中至寶不先剖獻君乃至公玉
人何嫌猜三獻兩見刖抱之發長號淚盡繼以血宋人
貴凡石得之梧臺東周客視之笑本與瓦甃同忠言翻
見惡藏之愈深固自誇天下珍和璧安足覩嗟哉優與
劣賤目豈能別

李季衡 一首

季衡名平孟璿之弟有西溪集

蘇臺

姑蘇臺畔舊長洲江水無情只自流人去不生歌舞夢
客來空動古今愁烟光漠漠孤城晚樹色蒼蒼故壘秋
不獨淒涼眼前事越王宮闕亦荒丘

徐璿 一首

璿字德熙

秋日江館寫懷

水國天寒樹影稀西風又見鴈南飛郢中白雪無人
和湖上青山有夢歸獨對浮雲傷往事驚看秋草又斜暉
十年浪跡烟波外滿眼塵氛未拂衣

朱純 三首

純字克粹紹興山陰人

登龕山

長江限吳越形勝一何雄
島嶼蒼茫外乾坤浩蕩中
江連理日霧汀暗走沙風
忽起乘桴歎滄洲不可窮

怨詞

井上梧桐樹密葉何沉沉
傷心昨夜月照見雙棲禽

天寶宮詞

落盡宮花輦路荒鑾輿西狩
嶺雲長詞臣休望金雞赦
蜀道艱難勝夜郎

李 勗 一首

勗字文勉紹興山陰人

布衣詩
宗晚唐好李義山

送春

強對東風酒一尊
留君無計黯消魂
綠波芳草汀邊路
飛絮殘陽柳外村
鶯倦語時渾寂寞
客傷離處又黃昏
寒燈孤館何曾寐
山雨蕭蕭獨閉門

李仲訓 一首

仲訓號峴山南昌人仕至吏科給事中

西臯詞

酒熟黃雞肥後月圓丹桂香
時誰道先生無事半醒半
醉題詩

賀 承 一首

承字宗振蘇州人

湖鄉佳處為朱昌年題

湖鄉佳處足幽棲
路入蒹葭望欲迷
一水遠連天上下
幾家如在灤東西
紅塵市迴人稀到
綠樹春深鳥自啼
何日編茆居此地
杏花春雨看扶犁

高璧二首

璧字貴朋紹興山陰人有遯菴橐

秋日逆旅送友人

七澤波濤險三邊道路窮
生涯同汎梗蹤跡歎飛蓬
晚色平蕪外秋聲落木中
毋將衰颯淚臨別灑西風

春草宮

宮花已寂寞宮柳亦凋零
惟有宮前草春來依舊青

胡紀二首

紀字大年舒城人永樂甲午舉人歷官山東布政司左參議

詩話大年以孝行聞父母之喪俱廬墓次猛虎引避羣鹿來馴有司旌表其門平生以詩畫書得名稱淮西三絕

寄懷翁復初二首

曾對東風倒玉壺
花前痛飲醉相扶
湘山此日君思我
苦竹叢深聽鷓鴣

別後茫茫歲月催
眼看花謝又花開
相思莫道書難寄
落鴈峰前有鴈來

王佐二首

佐字汝學臨高人正統丁卯舉人高州同知有

雞肋集

瓊州 二首

斷虹飲海日光移西北雲屯少定姿颺母呼風千里至
三間茅屋可能支
五指分山析四州那盆峻嶺却當頭一支瀉下朝東水
去與瓊州作上流

俞膺 一首

膺富陽人

詩話富陽春江隄在縣南菟浦至觀山三百餘丈皆壘以石縣令李濬所築歲久圯宣德十年知縣事吳堂允升重築之民感其惠更名吳公隄云

吳公隄歌

富春建邑臨濤江江聲日夕相春撞颺風秋來簸銀屋
海若欲使蛟鼉降蛟鼉降遲海若怒桑田往往栖鷗鷺
幾人縮手空嗟吁謂是天閻杳難訴吳侯請命不憚勞
隄成却恨來何暮老翁扶杖城南行喜見髻年舊游路
錢塘已祀看山蘇富春今拜番陽吳乃知興廢有前定
賢守賢令無時無賢守賢令無時無憑誰画作雙隄圖

陳延齡 二首

延齡富陽縣丞

妙智寺

永安山高一萬丈妙智寺建三千年古澗泠泠瀝蒼雪
画樓面面開青蓮老猿果熟占一壑怖鴿燈暝依諸天

老夫登臨發長嘯風露滿身寒不眠

大安院

詩人假榻古蘭若松風澗水相泠泠優婆塞傾椰子酒
須菩提譜蓮花經龍鱗樹老雨中翠佛髻山高雲露青
借問金仙渺何許香臺去後三千齡

黎公弁 一首

公弁字之冕臨川人舉明經正統中授臨潁教諭
諭調蒲圻有葦川雜詠

金壘山

青山天際來勢若雙飛蛾平明宿雨收嵐氣生林阿非
煙亦非霧炫日金碧多流鶯緩語處坐愛春風和

沐 璘 三首

璘字廷章定邊伯昂之孫贈都督同知僖之子
官至右軍都督特進榮祿大夫有集

滇南即事 二首

自昔梁州域西南路盡通碧雞名岫遠金馬故關雄羅
婦裙花布蒲蠻臂柘弓聖恩同覆載處處樂時豐
萬山藏古砦六詔雜諸蠻棘女頭籠帽番僧耳墜銀啖
蛇傳土俗屠犬祀神姦更有西戎種輕生性最頑

午日

蛇首裝船十丈長船頭鏡鼓間笙簧百夫劃漿齊聲去
阿瓦城河沸似湯

李分虎云阿瓦國王每夏五月以舟師會諸小國於江上都督沐璘作詩至今傳誦之

廖俊一首

俊字文英號竹崖蒲圻人中景泰元年鄉試授漢州學正調嘉定州有芙蓉百詠

詩話竹崖為漢州學正一日過開元寺聞諸僧誦經音韻朗然歎曰不愈於學生乎乃擇其年幼者四人趙杲方壁周冕張敖置之先賢堂中朝夕誨之後杲舉進士壁冕俱領鄉薦而傲亦由貢生為府通判再調嘉定手植海棠于學賦詩云曾於雨裏覓蒼苔幽洞移來手自栽枝幹已成人欲去好花他日為誰開每賓興以花盛開為驗云

西良湖

南邦遺跡在西良鳧依然滿石梁我向浮洲臺上立不勝惆悵到斜陽

潘亨四首

亨字從禮淮安山陽人景泰丙子舉人同知武

昌府事有冰壑先生遺藁

余子華云冰壑老人詩麗而雅郭克諧云冰壑之詩雋而不

露深而不僻質而不俚風乎大雅遺音詩話冰壑詩格高聳比於十才子似覺軼倫

北固晚眺

極目蒹葭外西風白紵涼殘霞隨野鷺落日送颿檣水接蓬萊近山連楚越長六朝遺恨在誰為管興亡

七里灘

怒濤催遠客帆落釣臺陰夜雨他鄉夢秋風何處砧渚煙籠樹杪澗水入溪深中有垂綸者茫茫不可尋

蟋蟀

愁對燈前影時聞牀下聲要知因物付何用不平鳴斷

日言終卷十九
續許多意淒涼無限情誰家急砧杵海內已休兵

聞子規

崎嶇蜀道馬行遲到處空山有子規慎莫夜啼枝上月
思家正是夢回時

張振一首

振字孟起嘉興人

貧居

青眼交游覺漸稀側身天地可相依若知白石真堪煮
何待黃精為療饑已過禁煙無熟食不因沽酒典春衣
蒼苔碧草侵階長高卧空齋晝掩扉

鬼椰揄於劉伯韓之側也

周青士云孟起貧居之作曲盡婁人情狀誦之若有

楊範一首

範字九疇鄞人有棲芸橐

鏡川

斜日一輪山上頭輕霞片片漾波流平蕪野岸碧千畝
喬木人家紅半樓沙鳥迴翔將下宿田夫被濯欲歸休
漁舟各已收緝去漸有燈明蘆荻洲

韓永一首

永字景修嘉興人

詠梅次竹鄰

昔訪逋翁宅牆頭露半梢因吟暗香句行過段家橋

盛寅一首

寅字起東吳江人太醫有流光集

暮春雜詠

青青楊柳拂簷牙杏酪香來客念家惆悵墓田吳苑曲
幾年寒食在京華

周德行 一首

德行嘉興人自號農圃居士

寄泮水諸公

早年曾許筆如杠老我于今興已降作客渾如錦江杜
攜家未遂鹿門龐沙鷗睡熟原相竝梁燕飛來偶自雙
昨夜夢魂歸別墅富春山鎖白雲牕

許穆 一首

穆字士深松江華亭人

送邵昇遠之官吉州

京華相見惜分攜歌罷驪駒思欲迷獨客自憐留日下
一官君喜向山西天涯月落聞雞唱驛路花開聽鳥啼
想得到州春未晚柳條垂綠草初齊

沈恒 一首

恒字恒吉長洲人

沈氏二先生貞字貞吉號南齋

兄弟自相唱酬下至僮僕皆諳
文墨同齋則石田先生之父也

題劉廷美画

十載天涯作宦游黃塵飛滿紫貂裘歸來不歎長塗險
猶寫關山萬里秋

岑 琬 二首

琬字公琬餘姚人有雪崖集

聞鶯懷戚學正在滄洲

我有故人在滄洲思之不見心悠悠木蘭為楫沙棠舟
南來鼓櫂乘中流嚶嚶好鳥如相求載飛載止鳴不休
願以盟言結綢繆為予一洗離居愁何以報之青琳球

松陵道中

野闊烟凝樹湖水近田丫鬢挑菜女獨櫓賣魚船烏
去青山外帆收古驛前孤吟看北斗戀闕竟忘眠

陳 離 一首

離字惟肅海寧人

葛嶺懷古

山上樓臺湖上船平章醉後嬾朝天羽書莫報樊城急
新得蛾眉正少年

錢 擘 一首

擘字允輝嘗熟人浙江都司經歷有避菴集

之云江陰周岐鳳多技能坐事亡命扁舟夜泊擘投以詩岐鳳得之大慟江南人至今傳之

贈澄江周岐鳳

琴劒漂零西復東舊游清興幾時同一身作客如張儉
四海何人是孔融野寺鶯花春對酒河橋風雨夜推篷
機心盡付東流水惟有家山在夢中

陳 顥 一首

日言終卷十九下
十
顥字漢昭嘉興人有竹鄰集

立春

蕭條書劒客邊身望望歸期過立春官柳漸黃梅已白
東風應笑未歸人

張 懔 二首

懔字汝誠鄞縣人有東臯集

四月三日

未盡傷春酒一杯微風吹雨又南來浮雲心事何曾定
逝水年華更不回數尺雞頭添穉竹一簾鼠耳長高槐
博山無火清香度何處薔薇昨夜開

贈天童詩僧讓公

自聞方外說天童夢繞青山十里松珍重能詩老支遁
尋常結社勝爐峯傳書度海朝憑鶴擊鉢臨江夜擾龍
今日東風花縣裏解衣留偈得從容

李 迪 一首

迪字叡迪鄞縣人

郊游

栗杖風前處處扶林花掩映失前途兒童也喜尋春客
說與東村賣酒壚

張 宥 二首

宥字繼孟吳人有夢菴詩彙

沈如美所画美人圖為徐文輝作

流蘇綴綵鴛鴦帳寒金鴨不飛香縷殘新霜撲簾白如粉
啞啞烏啼金井欄芙蓉屏開睡初醒守宮淺褪胭脂冷
玉釵慵整雙鳳皇春愁壓翠蛾眉長

送人之官嶺外

曉裝帶雪出吳門惜別休辭酒滿尊邊徼一官同謫宦
平安萬里即殊恩月明好度梅花嶺雨過頻穿柵葉村
想得龍城公退後故鄉風景與誰論

杜 瓊 二首

瓊字用嘉吳縣人自號鹿冠老人又號東原耕
者卒門人私謚曰淵孝先生有東原集

先生博綜

古今為文和平醇實本乎理道詩以博達為宗画師董源秀潤可觀

挽陸徵士

蕭蕭白楊樹瑟瑟鳴西風嚴霜隕百草草下哀寒蟲方
當歲徂邁那堪悲送終平生結交好一旦隔音容魂氣
竟何之遺軀返幽宮挽棺向西麓去去不復東斜照寒
無光頑陰蔽羣峰隧道一深閉千秋恨難窮徘徊不能
去灑淚心忡忡

采菱圖

苕溪秋高水初落菱花已老菱生角紅裙綠髻誰家人
小艇如梭不停泊三三兩兩共采菱纖纖十指寒如冰
不怕指寒并刺損只恐歸家無斗升湖州人家風俗美
男解耕田女絲枲采菱即是采桑人又與家中助生理

落日青山斂暮烟湖波十里鏡中天清歌一曲循歸路
不似邪溪唱采蓮

秦旭 九首

旭字景暘無錫人有修敬先生集

趙柱野云先生詩因事成言遇景命

賦直吐骨髓風骨自存 程克勤云公詩醜郁峻整

諸體咸備 李賓之云公詩得自祭能作驚人語

詩話景暘五峰之父五峰於天順間通籍景暘詩名著於鄉鄰久矣成

化壬寅結碧山吟社於惠山之麓與者十人陸勉懋成高直惟清陳履

天澤黃祿公福楊理叔理李庶舜明陳公懋行之施廉彥清潘緒繼芳

其一則景暘也時舜明年八十六景暘八十五天澤八十三懋成八十

二惟清七十九公祿七十三叔理七十二行之六十九彥清六十一惟

繼芳年未五十諸公強之入社其後享年八十餘是時常熟馬紹榮宗

勉榜其門長洲李應禎貞伯扁其堂盱江左贊時翊名其亭同邑邵寶

國賢為之記長洲沈周啓南為之圖江左傳為佳話吟社九人皆處士

獨景暘以子貴封武昌知府行之好著書故景暘詩云先生豈特天趣
高著書厭爵前人糟後於弘治元年上所著書大要謂尚書周易大學
中庸注失經迷臣有一得頗能析理通政使以奏內自稱庶人且穿繫
害道乞正其罪秦陵命焚其書押遣還鄉事載實錄而談修惠山古今

考遺

傷春詞簡繼芳

東風陣陣花狼籍老夫鈞簾空歎惜狂來扶病欲出門
門外春泥深一尺徐家園裏葛家樓回首繁華逐水流
安得紅顏生羽翼玉笙吹上崑崙丘

苦雨簡立夫

鷓鴣雙雙啼屋角細雨斑斑晴復作碧水蒼苔野外昏
挑燈坐聽簷花落輕寒惻惻透重扉番把羅衣換袂衣
出門可奈春泥滑孤負西山筍蕨肥

雨齋簡惟清

瀏瀏竹間雨瀟瀟牕外鳴小池收暑氣疎柳作秋聲鬢

雪蒙頭冷腰金照眼明年光太息迫何處學長生

酬黃公祿

春城無伴獨徜徉江草江波帶夕陽同學幾人千里夢
相思一日九迴腸東吳文社今寥落南國音書孰寄將
遙想杏花軒裏客習池蹤跡久荒涼

寄公祿

海內新詩久不聞東樓高卧思紛紛牕含竹色清如許
人比梅花瘦幾分銀燭翠壺歌白苧画船春水載紅裙
昔年樂事俱陳迹愁對孤燈更憶君

松菴避暑

秋燈禪榻鬢絲絲行樂鄉山也自宜草閣共招溪上月
茶爐重和卷中詩牧之有意尋春早靈運無緣入社遲
且與諸公相對飲風流不減會昌時

送人還京

青楓江上葉蕭蕭汴水淮雲去路遙宮燭漸低鄉夢斷
家山將近客愁消霜寒鐵甕秋聞柝月落揚州夜聽潮
厚祿故人如問我白頭甘作惠山樵

與懋成惟清公祿叔理舜明山行歸途有作

落梅風急放湖船六客逍遙是散仙雪白河豚新入饌
鵝黃楊柳未成綿松菴相地開詩社花市留衣當酒錢
寄語諸公慎終始莫因勤怠誤流年

題畫梅

沙際春烟濕未消
落梅風急送輕橈
江邊有客尋詩去
應在西湖第六橋

明詩綜卷十九下

春烟濕未消
 落梅風急送
 輕橈江邊有
 客尋詩去
 應在西湖第
 六橋

